



TAPAK 9

Kiralongrartemi amakba  
aitsür: Tir Pranab



TAPAK 12

Toronto Rogers Cup nung  
Sharapova nem wild card agütsü

VOL. XIV NO. 216 (ADOK 216)

DIMAPUR

THURSDAY

MAY 25, 2017

5.00

## Khriehu Lezietsu-i tebu asoshi lenmang lapoktsür

**Kohima, May 24 (TYO):** Northern Angami-I Constituency nungi Nagaland Legislative Assembly (MLA) züngsem Khriehu Lezietsu-i Bodbarnü pa menden toktsüogo aser iba ya ajanga by-election atema lenmang lapoktsüogo.

2013 state general election nung Khriehu ya Northern Angami-I A/ C nungi NPF ticket nung takok angu aser pa State Lotteries and Music Task Force indang Parliamentary Secretary teinyakdak nung MLA menden toktsü.

Pa ya Nagaland Chief Minister Dr. Shürhohelie Liezietsu'er jabaso tambusang lir.

Tanü NLA Speaker Dr. Imtiwabang-i MLA Khriehu-i züluba shidi agizük aser iba assembly mendenji tazüng ta metetdaksü.

Tebu-i by-election nung tokteptsü aser Chief Minister maneni inyaka aotsü atema Khriehu-i MLA menden nungi alu, ta NPF otongdar, Achumbemo

Kikon-i osangbener dang ashi.

State sorkari tetsür nem shilem lemzükja urban local body elections agitsü lemtetba anema nüborlemi ola adokba ajanga T R Zeliang-i chief minister menden toktsütsüsa aküm aser iba sülen Dr. Shurhohelie Liezietsu-i CM menden melenzük.

Dr. Shurhohelie-i chief minister inyaksü atema tenangzükba agidang pa NLA züngsem ka masü liasü aser iba jagi pai iba mapa inyakba sülen ita trok tsüngda election nung toktepa takok angutsüla, ta Kikon-i tanü metetdaksü.

Iba by-election atema Dr. Shurhohelie aser Naga Peoples Front (NPF) renema lir aser Election Commission-i tekaratiba nung election agitsü anogo sangdongtsü atema dang atar, ta paisa shisem.

"By-election nung Dr. Shurhohelie-i takok tulu angutsü onoki imlar" ta NPF atema otongdar-isa metetdaksü.

## Mizoram school kaket nung Anti-Tobacco lesson inoksemtsü

**Aizawl, May 24 (Agencies):** State nung moko tapu balala achiba nokdangtsü nükjidong nung Mizoram sorkari school syllabus nung anti-tobacco lesson inoksemtsü atema telemtetba agiogo.

New Economic Development Policy kübok Mizoram sorkari tanurtem anojungi moko aser temesepba mozü balala achiba nokdangtsü atema sangküm academic küm nungi upper primary schools tem syllabus nung anti-tobacco lesson inoksemtsü.

Osang ajanga ashiba agi, iba programme ya Aizawl district nung aliba middle school 50 nung tenzüksü. Mizoram state nütsüng shilem 70-ibo cigarette aser biri

achir aser shilem 90-i sada, zarda aser gutkha ama mokozü madokba mokotem achir.

State nung moko tali achiba ajanga India nung cancer tashidak tapu balala adokba temaba jenjang nung Mizoram lir.

Global Adult Tobacco Survey 2009-10 ajanga bushitetba agi, Mizoram nung moko achirtem rongnung tajemba agi shilem 9.3-ibo parnok arishi küm 15 majungdangyongi moko achi tenzuka liasü.

Küm ishika tejaklen Mizoram State Tobacco Control Society-i bushisüngdangba ka ajanga bushitetba agi, Mizoram nung high school kaketshir shilem 54-ibosa moko achir.

## Assam nung AIIMS amenoktsü

**Guwahati, May 24 (Agencies):** Ato kilonser, Narendra Modi mendenbuba ser amenba Cabinet senden nung Kamrup (North Guwahati Revenue circle) nung AIIMS ka amenoktsü atema agizükogo; Pradhan Mantri Swasthya Suraksha Yojana (PMSSY) kübok iba project nung sen crore 1123 indoktsü.

India sorkari iba telemtetba agiba mapang nungi tenzuka ita 48 tsüngda AIIMS ya tembanga yanglutsü. Pre-construction nung ita 15 agitsü, construction mapang nung ita 30 aser commission asütsü atema ita 3 agitsü.

AIIMS tasenba nungji yipten 750 hospital den trauma center facilities, medical college ka (küm shia MBBS kaketshir 100), nursing college ka (küm nung

B.Sc nursing student 60), residential complexes alitsü aser AIIMS, New Delhi nung aliba den kasa allied facilities/services alitsü.

Iba hospital nung Operation Theater 16 densema Speciality/ Super-Speciality Departments 22 alitsü, iba den külemi AYUSH department ka den sobaliba mozütem ajanga treatment atema yipten 30 alitsü.

Assam nung AIIMS tasen amenokba ajanga Northeast tesem nung aliba nüburtem nem super speciality health care agütsütsü iba den külemi National Health Mission (NHM) kübok primary aser secondary level institutions amenokba ajanga NE tesem nung doctor tem aser health workers aikati maongka angutsü.

(Maneni tapak 11 nung...)

## American missionary tem maru asübo Naga nunger iba jenjang nung melila



**Dimapur, May 24 (TYO):** America nungertem, talisa American missionary temi Naga nunger dangi Khristan yimsü bener aruba atema Nagaland Chief Minister, Dr. Shürhohelie Liezietsu-i parnok dang pelaba metetdaksü.

America nunger Missionary temi asen lima nung osangtajung mesangdong asübo, Naga nunger iba jenjang nung melila, ta paisa ashi.

Bodbarnü Rev Jeffrey S Buffkin-i anir Virginia Baptist

Missions aser Baptist Collegiate Ministry nungi telok kati Nagaland Civil Secretariat nung pa den ajurutepdang, Dr. Shürhohelie-i iba pelaba olen lemsatep.

Nagaland ya ali agi meketbanga aliba tesem ka dang masü saka linük tulutemi meketbanga lir. Ajisüaka, Naga nunger shinga tanga tamangba yimsü magizük, saka Naga nungeri tangar dang ang osangtajung prokshir, ta Chief Minister-isa America nungi aruba telok dang ashi.

Naga yimten tebilemtsü aliba ajanga Nagaland nung bilemba ama terenlok mali. Ajisüaka, teti atema telemtetba ka agiba sülen, kanga kara renloksü imlar, ta paisa tebilemba lemsatep.

Rev. Buffkin-i Naga nunger dang pelaba olen ka ashidang, Naga nunger shinga sülen masü aser wadang ajaklen state nung terenlok lir, ta ashi.

Naga nungeri nisung shibelenba maparen anema mapa kanga junga inyakba angudang kanga pelar, ta paisa shisem.

## Nagaland CM-i Burma Campaign Society tanishir den ajurutep

**Dimapur, May 24 (TYO):** Bodbarnü Nagaland Chief Minister Dr Shurhohelie Liezietsu-i Burma Campaign Society nung Chairperson, Wt. Akiko McDonald den ajurutep aser tena sensaksemdang, Naga nunger dena British aser Japanese nunger tsüngda yimjung yanglutsü indang tebilembatem lemsatep.

Burma Campaign Society (BCS) indang alizüngji, Second World War mapang Britain aser Japan tsüngda raraba aser iba dak sendakba ken o tem adoka aliba angatetteptsü aser putepshitsü

atema lir.

1983 nungi asür Masao Hirakubo OBE-i British aser Japanese sepaitem tsünga taitokteper putepa alitsü atema mapa inyaksü tenzük. Linük ana nungi taoba mapang sepai alirtemi Burma Campaign Fellowship Group tenzük. Linük ana tsüngda tesentaktep tajungba yanglutsü atema parnok UK, Japan, Burma, aser India nung külem 'memorial service' tem ayongzuka agir, ta tanü Media Cell, Chief Minister's Office, Nagaland sangdong ka nung metetdaksü.

"Ni Lieutenant General Sato

taküm otsü kanga sapua aküm, kechiyong kübo Taiji Urayama ji 31st Division nung lieutenant ka liasü. Iba division ya General Sato lenisüba kübok liasü" ta küm ishika tejaklen Wt. Akiko McDonald-i Japan Times nung ocet ka züludang ashi.

"Burma Campaign Society nung taoba chairman Hirakubo jia 31st Division nung lieutenant ka liasü aser ni amanger General Sato-i rara mapang telemtetba agibatem ajanga kübo aser Hirakubo na taküm kümzük" ta laisa ashi.

(Maneni tapak 11 nung...)

## Churachandpur nung anogo 632 sülen mang 8 remogo

**Imphal, May 24 (Agencies):** 2015 küm Manipur kübok Churachandpur district nung ILP Bill asem anema lungkak aйдang nisung 9 tepsetba nungi parnok mang ti Bodbarnü remogo.

Tanü Hiangtam Lamka Public Ground nung nisung meyirjang aika adenshia, tasür nem tetushi agütsüba sentong ka agi aser iba sülen Mata Khuga Dam, Lamka, Churachandpur nung aliba Memorial Ground nung mang 8 ji arem.

Iba sentong nung Manipur sorkar nung Minister tem-Thongam Biswajit, Nemcha Kipgen, Losii Dikho, V Hangkhanlian aser Chief Secretary Oinam Nabakishore nungertem aden.

Manipur nung tang aliba




sorkari tesüiba mapang jembidang ashi.

Minister V Hangkhanlian-ia tasürtem nem tetushi agütsü aser 2015 küm lungkak aйдang yiruyibongertem asoshi aria bilemtsüba osang metetdaksü.

(Maneni tapak 11 nung...)

## 'Na Koba Shiruru Mesük' ta asüba Ao kaket ka sayaogo



Rev. Dr. I. Imkong Jamir-i züluba kaket ka Ngati Baptist Arogo Pastor, Rikum (noksa nung abelen)-i sayatsüba mapang tangokba noksa nung angur. Mokokchung, May 24, 2017.

**Mokokchung, May 24 (TYO):** Ungma nung Rev. Dr. I. Imkong Jamir-i züluba kaket ka tenüing agi "Na Koba Shiruru Mesük" ta asüba kaket Bodbarnü World Aid Youth Mission (WAYM) executive member aser Ngati Baptist

Church Pastor, Wb. Rikum Lkr ajanga WAYM Discipleship Care & Counseling Training Center Mokokchung Chapel Hall nung meraketa lapoktsüogo.

Pai iba kaket lapokja jembidang, kaketzüluri asenok meimchirtem shiruru den libaliro

medemdangtsüsa bushiteta zülutetbaji kanga dang meranga sangraa zülüogo, ta ashi.

Asen tetsü teboui shiruru den atishitepasa asenok meimchir den jembia aru. Süra shiruru dakji koba ama yimya ka aketba ajanga atishia jembia, item olen tajungtemji mesamadaktsü wazüka ayutsü nükjidong yur iba kaket ya zülüogo, ta kaketzülur Rev. Dr. Imkong-i ashi.

Rev. Dr. I. Imkong Jamir ya World Aid Youth Mission (WAYM) nung Director lir aser pai mapang shia tena den apet kaket balala adoka amangbapurtem temoatsü jenti nga arudagi.

Pai tang adokba kaket ya talinürtemi ABAM book stall (MTBA Complex) Mokokchung nung angutsü. Iba dak sendakba nung kari danga tezülur den jeminüra iba mobile number (9402988869) ajanga tongteprateptsü akok.

## Tuensang nung solar street light sentong tenzük

**Dimapur, May 24 (TYO):** Government of India-i sponsor asür aser Directorate of New and Renewable Energy DNRE, Government of Nagaland ajanga inyaker. Iba sentong nung DNRE ketdangsertem, sorkar ketdangsertem aser sensotem aden.

Solar street installation ya Ministry of New and Renewable Energy MNRE, Sentong nung jembidang tongti tesendangeri, solar street light ya eco-friendly lir, ta ashiba

den külemi sensotem ajanzüktsü atema nübur meyong osettsüsettem kümzüka aser apayua amshitsü ayongzük.

Kasa sentong nungsa Deputy Director DNRE, Er. Inaho P Awomi-ia jembia liasü.

St. John A Tir, Bokei-i lokti pelaa agizük aser Executive Chairman St. John A, Namang Chubou-i tepela anküp o jembia liasü.

## Municipal ketdangsertem atema training tenzükogo



**Kohima, May 24 (TYO):** Department of Urban Development, Government of Nagaland, den Regional Centre for Urban & Environmental Studies, Osmania University, Hyderabad-i ayonga May 24, 2017 nü Conference hall, Department of Urban Development nung Nagaland nung Municipal ketdangsertem atema anogo asemnü AMRUT Training tenzükogo.

Iba training tenzükba sentong nung jembidang Urban Development Secretary, Mhotsuthung Lotha, NCS-i, terenlok atema Skill Development, Capacity Building aser Human Resource Development nung rangloker inyaksü nungdak, ta metetdaktsü.

Bendanger aikati linük nung Training agirtem ayongzüka pai iba sentong takok angutsü atema nendaka inyaksü ayongzük.

Iba training sentong tetenzük ya Director, RCUES, Hyderabad Director, Prof. Y. Pardhasaradhi leniba nung agi aser Urban Development Director-i lokti pelaa agizüka

sector balala nung sen indoka inyaksü melunga lir, ta shia pai, capacity building aser human resource maliba ajanga, asenoki asen state nung parnok nem sen indoka inyakdaksünüaka takok mangur, ta ashi.

"Tamenbo sentong balala atema awareness ji agency mesüra authority nem dang agüja liasü, saka tangbo ajungaji melenshia ajaki shilem agitsü nungdaker," ta paisa ashi.

Training agirtem ayongzüka pai iba sentong takok angutsü atema nendaka inyaksü ayongzük.

Iba training sentong tetenzük ya Director, RCUES, Hyderabad Director, Prof. Y. Pardhasaradhi leniba nung agi aser Urban Development Director-i lokti pelaa agizüka

jembia liasü.

Anogo asemnü training nung Urban reforms: challenges: Significance of leadership, AMRUT mission okila, components & process, SLIP'S & SAAP'S, service level benchmarks, reform oriented projects; E-Governance best practices: Strategies, accountability & transparency; Urban infrastructure projects: Water, sewerage: Context of AMRUT; PPP Model of Parks; PPP: Significance & potential: PPP Pilot projects; Stakeholder participation: Solid Waste Management: Preparation of DPR: Components: AMRUT; and Financing options for Urban Development; concept of CSR & strategies to mobilize funds onüktem nung agitsü.

Strategies, accountability & transparency; Urban infrastructure projects: Water, sewerage: Context of AMRUT; PPP Model of Parks; PPP: Significance & potential: PPP Pilot projects; Stakeholder participation: Solid Waste Management: Preparation of DPR: Components: AMRUT; and Financing options for Urban Development; concept of CSR & strategies to mobilize funds onüktem nung agitsü.

## NLA atema GST workshop akatsü


**Kohima May 24 (TYO):** Banquet Hall, Kohima nung Finance Department (Revenue Nagaland Legislative Assembly Branch)-i sangdong ka ajanga, May 26, 2017 nikongdang 3:00 ako nungi tenzüka State ka akatsü, ta metetdaktsü.

## Zila Sainik Board, Mkg sangdong

**Dimapur, May 24 (TYO):** Zila Sainik Board, Mokokchung Secretary, Lt. Col. Joy Choudhury-i, June 19, 2017 nungi July 30, 2017 nü tashi Happy Valley, Shillong nung Assam Regimental Centre-i ayonga Recruitment Rally ka akatsü, ta metetdaktsü.

Iba rally ya Unit HQ quota kübok akar, anungji iba rally atema tenüing agütsütsü asoshi temsüa alir candidate temji: raradang asüba ajanga amitsür/sangremer jabasotem, Service/Ex-Servicemen jabasotem, Servicemen/Ex-Servicemen chichiba adianutem aser TA chirtem alitsü.

## NPSC züngsem tasen tenangzükba agi



May 24, 2017 nü Raj Bhavan, Kohima nung Nagaland Angh, P B Acharya-i ketdangtsüa NPSC züngsem atema Vipralhou Kesiezie tenangzükba agidaktsüba noksa nung angur.

**Kohima, May 21 (TYO):** Kohima Village nungi lir aser May 24, 2017 nü Raj Bhavan, Kohima nung Nagaland Angh, P B Acharya-i ketdangtsüa Nagaland Public Service Commission (NPSC) züngsem atema Vipralhou Kesiezie tenangzükba agidaktsüogo.

Bodhbarnü tenangzükba agiba sentong nung Nagaland Chief Secretary, Pankaj Kumar, NPSC Chairman aser NPSC züngsemtem dena liasü.

Vipralhou Kesiezie ya 2016 küm SCERT Director mapa nungi anisingzükba tashi Nagaland sorkar tenzüka liasü.

Pa ya Education Sector, Nagaland Vision 2030 nung Anchor lir aser APO nunga Advisory züngsem ka lir. Vipralhou Kesiezie-i NEHU, Shillong nungi Education nung MA degree angu aser Education & Vocational Guidance (NCERT, New Delhi) nung PG Specialisation agia liasü.

nisungbaji Thahekhu village, Dimapur nung alir arishi küm 35, Levito Swu lir ta jangjaogo, aser pai Dimapur nung ozüing alema prangpong shibelenba mapa inyakba nangzükogo, ta AR sangdong nungsa shia lir.

## 41 AR-i prangpong shibelener ka apu

**Dimapur, May 24 (TYO):** Prangpong shibelener aliba osang ka lazükba sülen May 23, nü HQ IGAR (North) kübok 41 Assam Rifles sepaitem den police züngsemtem densema Dimapur nung Thahekhu tesem mita ao, ta AR sangdong ka nung metetdaktsü.

Mita aoba mapang Assam Rifles sepaitemi nisung ka ket nungi Pt 22 mm Pistol ka den magazine apu, aser iba Maneni bushisingdangtsü atema pua alisang den pa ket nungi apubatemji Sub Urban Police Station, Dimapur ket nung agütsüogo, ta sangdong nungsa shia lir.

Maneni bushisingdangtsü atema tena West Police Station, Dimapur ket nung agütsüogo, ta sangdong nungsa shia lir.

**32 AR-i NSCN (K) züngsem ana apu**  
**Dimapur, May 24 (TYO):** NSCN (K) züngsemtem aliba osang lazükba sülen May 23, 2017 nü HQ IGAR (North) kübok 32 Assam Rifles sepaitem den police-i Dimapur nung Duncan Basti tesem mita aodang melung melemteni nisung ana- NSCN (K) nungi Mokokchung district nung alir arishi küm 37 SS Sgt Maj T Rongsen Ao aser Padampukhri,





Guwahati, May 24 : Guwahati nung May 26-nü Ato Kelonser, Narendra Modi-i nūburtem den jembiba mapang amshitsü atema yangluba tesem nung Assam Chief Minister Sarbananda Sanowal aser ketdangsertemi semdangba mapang tangokba noksa nung angur.

## FKJGP pur-i Dhar construction Company aitsür

**Shillong, May 24 (Agencies):** Nongphlang-i ashi.

Dhar Construction company-i 7 mile nungi Lumlawbah tashi lenmang yanglushitsüba maparen nung temolung magütsüi inyakba atema Upper Shillong, Federation of Khasi Jaintia & Garo People (FKJGP) pur-i Mongolbarnü aitsüogo.

FKJGP ajanga ashiba agi, iba lenmang yanglushitsü asoshi kecha nungdaka meliasü saka inyakshi. Iba lenmang yanglushitsü asoshi Dhar construction company nem nongloktsü. "Onoki kanga mepelai bilembaji, iba lenmang yanglushir ita majung tsüingda nung lenmang raksaa aoba repringteter," ta FKJGP Upper Shillong tir, Kitboklang

Nongphlang-i ashiba agi, FKJGP pur-i, National High Way Division, SDO PWD Road Y. Lyttan den külemi Mongolbarnü lenmang semdanga ao. Parnoki lenmang yanglur ita majung tsüingda nung lenmangtem raksaa aoba, talisa 3 mile nungi tenzüka Gorkha Secondary School tashi lenmang jenjang kanga mejungi kümer aliba ngutet.

Dhar Construction company-i lenmang temolung agüja meyangluba repringteta, FKJGP-i PWD ajanga company dang lenmang tanaben yanglushitsü asoshi tetuyuba agütsütsü atema akhang. Kasa mapang nung

parnoki department dang nūburtem rongsen amajok nung melalutsü asoshi ashi.

Osangbenertem den jembidang, Nongphlang-i ashiba agi, yimti nung construction mapatem timba ka Dhar Company-i inyaker. "Lokdi ka ama onoki, iba company-i mapa junga inyaker ta shia mapa agütsüba atema kecha mashishir. Aji saka company-i Upper Shillong lenmang mesüra PWD ji par kinunger oset ka ta mebilemstüla," ta paisa shisem.

Maneni FKJGP lenir-i ashiba agi, iba maparen dak sendakba nung company ajanga lenmang yanglushitsü atsülanga ora parnok anema PIL ka file asütsü.

## Army, Police aser CRPF tem lungjemer Chirang district nung mitabushiba ya renemer dang liasü: CRPF IGP

**Guwahati, May 24**

**(Agencies):** Army, Assam Police, CRPF aser Sashastra Seema Bal (SSB) longjemer taküm March 30 anepdang Chirang district nung mita bushiba ya renema dang liasü, ta North East nung aliba CRPF telok nung Inspector General of Police-i aitsü.

Amguri police station kübok Simlaguri yimtsüing nung mita bushiba mapang National Democratic Front of Bodoland (Songbijit) mesüra NDFB (S) telok nungi südi, ta temolung malemba nisung ana tepsetba ya renema dang yur inyakba liasü. Iba nisung ana ya D-Kalling yimtsüing nung ki ka nungi apu aser taochi melie Simlaguri nung tepset, ta Gujarat cadre IPS officer, tang CRPF, North East Sector indang IG, Rajnish Rai-i Delhi nung aliba CRPF headquarter dangi yokba osang nung shia lir.

Iba mita bushiba yimya nung tashishitsü lir aser tasüming nung prangbong ya mita bushirtemi inoktsü anungji iba ken o bushisüingdang asütsü telok balaka shimtsüla, ta Rai-

i ashi.

Iba maparen nung tepsetba nisung ana ya Lucas Narzary alias N Langfa aser David Islary alias Dayud, ta jangjaogo.

Rai indang report ya 2017, April 17 nung agütsü aser iba osang ya Assam Chief Secretary V K Pipersenia, iba lendong adalokba mapang acting CRPF DG inyaka alisang, Sudeep Lakhtakia; Lt Gen A S Bedi, GOC, 4 Corps & Chairperson, Operational Group, Unified Command; Assam DG Mukesh Sahay; SSB DG Archana Ramasundaram aser CRPF ADG (NE Zone) Mohd Javed Akhtar nung dangia yokogo.

Rai indang report nung telangzüba agütsütsü asohi osangbener telok ka ajanga May 22 nung Army aser SSB odongtar dangi email yok, saka telok katia telangzüba magütsü. Anünü tashi Assam Chief Secretary dang call süa text message yokaka kicha telangzüba meliasü.

Osangbenertemi Rai indang repor atema kechi tebilemba lir, ta Assam DG, Mukesh

Sahay dang asüingdang, "Mitabushiba mapang anidaktsü asoshi totuyuba aser temzüing lir. Item totuyuba sülen sashi-sashia anidaker. Inspector General of Police ka aser magistrate kati anir iba ken o bushisüingdangba mapang lir. Anungji iba bushisüingdang maparen atemba sülen ang Rai indang report ya repringshitsü," ta langzü.

"Iba osang ya Assam police nem agütsüogo anungji iba ken o bushisüingdang asütsü asoshi parnok (Assam polic) ket nung tashi aser temeden lir. Parnoki bushisüingdangba nung meshidak kuli kar ngutetra aibelena alir nem tapet temerenshi agütsütsü," ta CRPF DG RR Bhatnagar-i ashi.

Mitkartemi asür ana temang nungi 5.56 mm INSAS rifle ka den magazine aser 5.56 injang live round ana, 5.56 ammunition indang injang tazüing 9, 7.65 mm revolver ka den 7.65 ammunition indang injang tait asem aser tazüing asem aser Chinese hand grenade ka ngutet, ta ashir.

## Tzünglu aser yipur tesashi ajanga Tripura nung takoksa alu

**Agartala, May 24 (Agencies):**

March aser April tsüingda nung tzünglu tesashi aruba den külemi yipru aitiba ajanga Tripura nung nisung 4 tepsetba aser parnok 19 yiruba, sorkar osang ka ajanga metetdaktü. Kasa mapang nung tsünüsempongtsü; tsük aser aounsotsü densema sen 20, 72, 74,968 jenjang yipur ajanga raksatsüogo.

Tanga tesemtem dak alaka Gomati District kübok Udaipur tesem nung tsünüsempongtsü timtiba raksaa liasü. Iba tesem nung tsünüsempongtsü sen jenjang 13,41,18,701 alang

raksa aser South Tripura district, Sabroom tesem nung tsünüsempongtsü sen jenjang 11,95,967 alang raksa, koba ajak dang tajemtiba liasü.

Sepahijala District kübok Bishalgarh tesem nung tzünglu kanga sashia aruba ajanga tsünüsempongtsü sen 8,40,00,000 alang raksaaogo.

Belonia aser Santir Bazar sub divisions tesemtem nung tsünüsempongtsü sen 6,44,90,300 jenjang aser sen 66,30,000 alang tzünglu aser yipru ajanga raksatsüba kasa osang ajanga metetdaktü.

## Sukhoi-30MKI fighter jet Arunachal Pradesh nung aliba lazükogo

**Guwahati, May 24**

**(Agencies):** Indian Air Force osang dak ajemdaker Sukhoi-30 MKI fighter jet samara aliba Arunachal Pradesh kübok Kamlang wildlife sanctuary nung lir ta bushitetogo.

Iba dak sendakba nung Army aser tanga paramilitary force temi bushisüingdang tenzükingo. Kamlang wildlife

sanctuary ya Tezpur nung amenoker aliba Missamari air force base north len lir. Iba tayimtsü ya airbase nungi north-west len kilometre 60 shi orr sama.

Iba tayimtsüya squadron leader ka aser flight lieutenant kati anir mongolbarnü airbase nungi anepdang 10:30 ako shi nung aposua liasü.



Guwahati, May 24: Forest ketdangsertemi May 24 nü Amchang Wildlife Sanctuary nung shiti ka yirur awatsüing kati yir aliba kümzüksü merangba noksa nung angur.

## Lenmang nung ango aser shi ayokba Deobarnü tashi nung shibangtsütsü

**Guwahati, May 24**

**(Agencies):** State sorkar ajanga Kamrup Metro district ketdangsertem dang Deobarnü tashi nung yimti lenmang nung ango aser shi ayoker tem parnok shishilembaba anendaktsütsü asoshi tetuyuba agütsüogo.

Guwahati Development MGVK Bhanu in-charge, Additional Chief Secretary lenisüba kübok Guwahati Circuit House nung emergency senden ka Hombarnü amenba nung iba telemtetba ya agi.

Iba dak sendakba nung Kamrup Metro Deputy Commissioner, Guwahati Commissioner of Police, Guwahati Municipal Corporation (GMC), Commissioner, Guwahati Metropolitan Development Authority

(GMDA) Chief Executive Officer aser Chief Food Safety Commissioner nung ajak dang külemi longjemer inyaktsü asoshi pai tetuyuba agütsü.

Lenmang nung khen atema shishilembaba mapa inyakertemi Deobarnü tashi nung parnoksasa manenra, tashiyim agi parnok shishilembaba shibangtsütsü.

"Ango aser shi ayokertemi merekmeju kecha makai yimti lenmang nung ango aser shi ayokba küm isheka ngua aruogo. Iba ya nūburtem anema alitsüba asoshi lendong ka kümogo. Anungji ketdangsertemi merekmeju makai yimti lenmang nung ango aser shi shishilembadak lapoka alibatem shibangtsütsü telemtetba agiogo," ta ketdangsertemi metetdaktü.



# TIR YIMYIM YIMOBILEM (EDITORIAL)

DIMAPUR THURSDAY, MAY 25, 2017

## Tetsü oshi angazükba mapang

Taoba alima aso 19 buba tatembanglen nungi tenzüka asen lima nung America nung arua zülutsü aser azüngtsü sayuba nungi tenzüka alima aso 20 buba songtema asenok Aortemisa tesapuba sapua English angazüka aruogo. Aji oda, alima nung English jembir kintemang tashitemetet kintem asünungji English jembir ashirbo ajunga tashitemetet ama züngshia tang tashi arur. Iba tebilemba aser tangatetba jagi Nagaland nung, talisa, Aortemi pei tetsü oshi jembibabo mashimemetet teküpbok tia nung alirtem ama bilema pei tetsü oshi agi nümamedangtet talangka lia arudagi. Ajisüaka, pei tetsü oshi agi peisasa nümamedangtetbaji matumalem tuluka asütsü. Aji oda, English oshi kija ashiba agi English nung masüba nisung ka pei lima nung pei nübortem den lia aotsü mapet akümer. Tanü asenok Aortem rongnung tebilemtsü tuluka adoka alibaji semchirtemi pei tetsü-tebou den sensak masemtetter, kechiyong semchirtemi Ao mashi aser otsüla oboula nungertemi English mashi aser Nagamese-a mashi. Ibayongji, semchirtem dang tagitsü sobaliba otsü aika shinüaka meshitet aser semchirtemia angazüknuaka mangazüktet, temang majungba agi chiyongtsü ki sünga bendena yur mechitet ama, kangshir aser Ao kin sobaliba aser aküm samar. Shitakba agibo, alima nung English sapua jembiba ama Nagaland nung Ao oshi ya ajaki sapua jembitsüla, ajisüaka kiburi dena mesapu nungji tangaria mesapui kümogo. Tanü Naga nung oshi rongnung University tashi nung sayuba oshiji Tenyidie oshi ya lir. Iba oshi ya Angami, Chakhesang, Rengma aser Zeliang nungertemi jembir. Atangji, parnok rongnunga pei pei oshi aser osü tapu balala lir, saka Tenyidie oshi nungji parnok longjemmer, anungji Tenyidie oshi jembiba kintem longjemmer Tenymia kin kümogo. Iba amaji oshi agi kin ka kuma longjemdaksür. Atangji, Nagaland nung Tenyidie dangbo Ao oshi tama kaketreju nung sayu tenzüka saka tanübo parnok nem ajatetdaksüogo. Tenymia nungerbokomatashika tashitemetet kümdir kümaka aser komaka uludir uluka, parnok oshi jembitsü aser parnok süoshi kanga sapua abentsü. Parnok amaji masü asenokbo komaka tashitemetet kümdir aser komaka uludir Ao oshi mejembitsü meranger, kechiyong pei tetsü oshi jembibaji peisasa pei alur amai asenoki bilemer. Tanü Tenymia nung Tenyidie anogomong among tenzüker 47 buba mong amongba angashidang, asenoka parnok amaji pei tetsü oshi mesamadaksüi tajungba renloka odaksütsü asoshi asentenshitsü ayongzüker. Atangji, asenoka Ao Senden Literature Board-i Ao oshi renlokdaksütsü asoshi kanga meranga inyadagi, saka asenok tsürabur aser lanurtemi asen tetsü oshi jembitsü, zülutsü aser renlokdaksütsü mejangrara parnok mapaji amajok asütsü aser küm ishika tsüngda Ao oshi alima nung mali samatsü. Iba amaji atalokra koda takoksa aser tesusatsüka asütsü. Ibaji nukla nung yur Aotsür Aor ajaki pei tetsü oshi wazüka ayuba dang masü saka renlokdaksütsü merangtsüla. Kena tia junga tang Nagaland government-i school ajak nung pei tetsü oshi sayutsü aser angazütsü telatetba agütsüogo. Aji oda, sangküm nungibo Alternative English melen pei oshi dang agitsü. Ibaji asenok ajak asoshi osang tajung aser tayongzükba tuluka südaktsütsüla. Asenok Ao oshi liromedemtsü atema Jungli agir, aji junger. Ajisüaka, ano oshi takar kümdaksütsü atema Mongsen dena sayutsüla aser angazütsüla. Aji oda, Jungli Mongsen dang masü saka ano yimtsüng kar nungbo pei yim oshia lir, itemjia dena mesamadaksüi nümadangdanga jembitsüla aser arok Ao oshi nung dena enoksema jembitsüsa lenmang sayutepa ajungshiteptsüla. Iba jagi asenok tali kinunger akümstsü aser putepa litettsü.

## OLEMSABANG

### ORGANIC FARMING NUNG GREEN MANURE ASER BIOFERTILIZERS AMSHIBA AJANGA TAJANGZÜK AGÜTSÜBA

I. LIPOKONEN JAMIR

Asstt. Agronomist & Co-Ordinator ATMA

Tanü asung asenok ajaki temang anema alitsü asoshi chiyongtsü kanga kumdanga achir. Aluyimba nung shisashir aser doctortem-ia chemical mamshiba chiyongtsü tem-ang ayimtsü aser achitsü atema asenok nem lemsatapa arudagi. Anungji aluyimertemi organic farming ya kanga junga angateta tali meranga tajungba nung inyaksüla.

Kodang aluyimer-i chemical mozütem amshitsü melena tsünusempongtsü melentepa ayimba (crop rotation), nashisü mol, aksü mol, süng mol ama organic manures, green manuring mesüra bio-fertilizers etc. ama amshia alu yimdir, iba dang ya Organic Farming ta ajar.

Sürapangla, organic farming ajanga aluyimer nem kechi tajangzük agütsür aji asenoki metetsü merangdi:

1. Clean Environment: Meketa aliba tzü mopong merüka yutsür.
2. Reduces Health Hazard: Nisung aser shiruru temang timtem balala nungi kumzüka anema yutsür.
3. Gives Toxic & Poison Free Fruits/Vegetables: Alu nung tsünusempongtsü adokba tem nungji miim (poison) malir. Iba jagi asen temang nung kecha timtem magütsür.
4. Conserve Soil Nutrients & Enriches the Soil: Mozü mamshiba ajanga ali aser ali temo tajung wazüka ayur.
5. Saves Farmers Economy: Jenjang tasak mozü temji mamshiba ajanga aluyimertem sen indoka ayimtsüba nungi kumzüker.

Ano maneni, asenoki tang Green Manuring aser Bio-fertilizers tem ya kechi aser item yagi organic farming nung kechi tiyari agütsür aji asenoki angatetsü merangdi.

Organic farming nung green manuring aser biofertilizers-tem ya kanga tongtipang hathi-errtem (tools) lir.

Alu nung tsünusempongtsü kar metsü proker külen anogo ishika mesüra ita ishika dang alu nung yur külen pa lanu aliba mapang nungjisa tazünglen nungi lepdoker külen ali den meyokteper mol kümdaksüba dang green manure crops ta ajar. Saka tsünusempongtsü ajak bo green manure crops ama mamshir. Asenoki amshiba green manure crops kar temji yamai asütsü - Daincha (most popular green manure crop), Cowpea (Lolly), Green Gram, sunhemp aser soyabean (azüngken) lir.

#### Green manure-i tajangzük agütsüba (Advantages of green manure):

1. Aluyimba nung amshitsü temela.
2. Ali mol junga kümdaksür.
3. Iba green manure crops tem ya aindang ali ajunga mokpanga adoker (cover crops) asü nung item yagi anentsü (soil erosion) aser ai tem nungi kümzüka ayur.
4. Iba yagi tsünusempongtsü nem tenügdaksü chiyongtsü (nutrients) agütsür koba teyari jagi parnok junga indaksür.
5. Iba ya kanga anepalua ayimtsü menügdaker (Requires less management).
6. Green manure crops temya Agri. Dept. nungi anguts tsünusempongtsü akok. Bio-fertilizers ya packet nung seper angutsü/alitsü koba telong nungji mejang ama powder den tenük agi manguba mesen takümtem lir aser kodang ali den meyokteper amshidir, mol tajung kümdaksür koba ajanga tsünusempongtsü temji junga yindaktsür.

Market nung anguba/ayokba bio-fertilizers kar yamai alitsü. Rhizobium, azotobacter, azospirillum, acetobacter, blue green algae (BGA), azolla, etc.

#### Bio-fertilizers-i tajangzük agütsüba (Advantages of bio-fertilizers):

1. Iba yagi tsünusempongtsü nem tenügdaksü chiyongtsü (nutrients) agütsür koba teyari jagi parnok junga indaksür.
2. Meketa aliba tzü mopong nem kecha takoksa bener marutsür.
3. Chemical mozü mamshiba ajanga ali temo aser mol tajung temji kümzüka ayur.
4. Ali nung aliba mesen tamajung temji tepseter aser tsünusempongtsü dak adoktsü aliba tashitak tamajung suita ayur.
5. Bio-fertilizers tem ya packet nungdang angur anungji transportation aser storage mapang nung kecha timtem magütsü.

#### Q & A

1. Bio-fertilizer rhizobium ya koba tsünusempongtsü nung amshir?  
= Iba biofertilizer ya motor, beans, azüngken amala tsünusempongtsü nung amshir.
2. Azospirillumji kechisa tsünusempongtsü nung amshir?  
= Tsük, menti, menjang, jenjang, wheat yamala tsünusempongtsü nung amshitetter. Azospirillum-i alu hectare ka nung nitrogen 20-40kg yanglur.
3. Azolla ya tekong lu nung asü tzü-lu nung tajungba amshir?  
= Azolla yaki tekong lu nungbo nitrogen kanga jungarabo meyanglutetter. Saka tzü-lu nung azolla-i hectare ka nung nitrogen 40-80kg tashi yanglutsür. Anungji tzü-lu nung amshiba ji-ang tajungba asütsü.
4. Tzü-lu hectare ka atema, azollaji kwi nungdaksü?  
= Azolla-ji Tzü-lu hectare ka atema 10Qts (1000kg) nungdaksü.
5. BGA koba tsünusempongtsü nung amshir?  
= BGA (Blue Green Algae) ya tsük lu nung amshi nungbo kanga junger. Hectare ka nung 20-30kg nitrogen agütsür. Hectare ka nung 10-15kg BGA nungdaksü. Tsük transplant sür külen anogo tenet (7) lir, tzü cm 2-3 atsüngtena yutsür BGA ji agütsütsüla. BGA ji packet ka (1kg) nung senpak 20 aki market nung angur.
6. Green manure crops temji tsüngküm ka nung dang amshitetter asü?  
= Summer mesüra winter tsüngküm ajak nung amshitetter. Summer nung amshitetter green manure crops temji item ya asütsü - dhaincha, soyabean, green gram, etc aser Winter nung - cowpea (lolly), black gram, berseem, etc.
7. Tzülu nunga green manure crops temji yoktsü asü meyoktsü?  
= Ita ana jelia green manure crops temji tzülu nungji yoktsüla. Anogo 30-35 days sülen ali telongi yoker pa sasa mol akümstsü koba ajanga tzülu tsükji junga indaksür.

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir



## NA TEPELA ASER YIMJUNG ANGUTSÜ

Mrs. Meyisongla, Rtd. Dy. Director Nursing, Nagaland Kohima

Nai kodaka aroka laishibaji bushidir, nai nü takumji tali tejangjaba aser tajungba angatetsü ta Arthur. S. Maxwell-i shia lir. Nai laishiba tali aroka bushiba jagi na Tsüngrem anasai aor aser Abraham ama na Tsüngrem tembar (friend) akümer. Idangji na tepela, anisüngzük aser molung süa jangratema alir (contented-satisfied). Na ajanga nür kibong aser purmedemsortem den tesünep alitsü.

Reprangdangra tanü lima nung nisung million aika tepela aser tesünep mali. Parnok junga amoi moteter, shisa bulur, parnok tasü maiter (nervous), parnok psychiatrist dangi aor. Kodasür amoi otettsü? Koma sür pelaa alitsü aser tarutsü tia tajungba ajangzükettsü aser chirnur marble ki nung kecha agia anüngaponga melii jangratema lidaktsünür, parnoki tepela aser anisüngzükji bilemer saka monguteter. Ya kechiba? Kechiaser ampangyim/tashiyim aser morohmoroba nung tepelaji mangutsü. Tejashi ang tali bendenloker. Parnok tsübua alir.

Kechiaser tepela aser anisüngzükji Yisu Khrista dak chichia amang nung dang angutsü. Iba tepelaji sen agi alitsü makok. Mapang agi alangtsü makok. Angati temeim, masahdangtetba taochi tesünep angur. Yisu den temba ayimbaji (friendship) ak kolak sor yi mayonga ajemba aser shini mamatzü ayizüka yur biscuit mayonga ajemba dang taoba. Ak shi jenjang tasak, tachitsü tajung saka temang atema majung. Akshi aser shinü mamatzü tali chira blood pressure atur, diabetic tashidak adoker. Yi agi temesen rongzük, salimoko agi tekuh ashidak eg.T.B aser cancer tashidak adoker. Shi jangraba mapa (nüktapangta) agi HIV/AIDS tashidak menar aser taneptsü mangur. Temang anema linüra itemi machiang tajungba. Chira limit ka achitsüla. Ano tim mesüi rakzükraaktemba, sen aser osettsüset agi kodanga takar makümer saka tanülabo Rajang kümduksür, Sünepa malir, Tepela samar. Shisabulu agi junga mechiyonger, kongrasüker aser tashidak tapu ajak agi melamela atonger.

Isaia 57:21- Tamajunger atemabo kecha nunga tepela aser anisüngzük mangutsü ta Tsüngremi ashir. Oh Tsüngrem nü dak sota aliba temolungjang nai tesünep teperi nung ayur

Isaia 26:4- Nenoki teti asoshi kibuba dak amangang. Kechiyong kibuba dak teti tatem maka lung lir.

Tenüngsang Ken 90:1-2- Kibuba putu ajak nung na ozü talidak süa aruogo. Tenemtem makümdang mesüra ali aser alima meyangludang oda teti tatem makaba mapang nungi na Tsüngrem. Tsüngrem temeimji kodanga masür. Pa kodang memelenshiba Tsüngrem. Pa asen tembar lir. Na pa den tembar süa lira na teti pelaa aser sünepa alitsü. Tsüngremi tejak tepang merepranger.

Mika 5:2- Saka na oh Bethlehem, Efrata koba yehuda kidong rongnung densemstsü onsara tila lir. Na nungi ni asoshi Israel madak yimsüsür ka adoktsü shiba alemli mapang nungi lir.

Mat 11 : 28-30 - Nenok tebelemer aser khu reta abener ajak kü dangi arung aser ni nenok nem anisüngzük agütsüdi. Nenoki kü sünggra nung apuang aser ni nungi angazükang kechiaser ni ajemalur aser molungsentsü anükanüker, aser nenoki nenok tanüla asoshi anisüngzük angutsü. Kechi aser kü sünggra melamelar aser kü khu pongbapungpar

Yohan 14 : 33 - Ni nenok den tesünep toktsür, kü tesünep ni nenok nem agütsür. Nenok temolung teraksa aser tsübua teli.

Yoh 16: 33 - Kü dak nenok tesünep angutsü asoshi ni nenok dang itemi jembiogo. Alima nung nenok timtem tekangshi kar. Saka tasü itang ni alima kokogo. Zülua makaba otsüren aika jembi nung tejashi aser molungzürep dang tali bendenloker, saka shibai Tsüngrem bushir pai ochi ajakji kaktetsü aser yangji tepela aser tesünep angutsü. Nenok shisa bulua teli temenen nem nenok tekokdaktsü, aji süitema aotsü parnok maksü nung atemtsü.

2 Peter 2: 9 - Temeshipur tatidang nungi kümzüktsü aser ochi mashibapurtem merenshitsü asoshi o bendangba anogo tashi yua atatsü koda kibubai meteta lir.

(24) "Azüi pei saktüdangji meyipa shilanger aser aki tzü chikor lishi menütsü meyipa aor"

Mat 6 : 33 - Saka tamasa nenoki Tsüngrem yimli aser pa temeshiba bushiang aser item ajak nenok nem bendenloksütsü

Filipi 4 :4-6 - Teti kibuba nung pelaang, tanabena ni sheti pelaang. nenok tazüzükba nisung ajak nem metetdakjang. Kibuba anasa lir. Kecha nunga temolung tatem ma saka, ajak nung sarasademba aser mepishiba aser tenüngsang agi nenoki mepishiba Tsüngrem nem metetdakjang. O bendangbah salang nung nokdakdang, Tsüngremi agütsüba shisatsü.

AP. Shin 22 : 17-21 - Shishakar shin o semer

17 - Nü tenarong tenang aser shisa takar o temji angang aser kü shisatsü nung nü molung tendangang. Itemji nü den yura parnok nü bang nung renema lir, aji jangratemsü lir.

19. Kibuba dak nü temolung alimba ayutsü atema, oda nü dang, tanü ni itemji metetdaktsüogo.

20 tekümdangtsü aser shisatsü shinba semer, nü nem mezülutsü ama?

21 shirnoki na yok, parnok dangi telangzüba shidak nai agütsütsüsa, koba shidak aser ochi aji nü dang sayutsü.

Lipok 49 - Yacober jabaso tambusang Reubeni aser par tenet (7) nem atakatem senmang agutsü.

Saka Yosef aser par tenu pungo (5) nem temoatsü senmang agütsüba indang ya asenoki lipok tapu 49 ya azung nung ajak angajemtsü ta bilemer.

Tsüngremi iba ocet azünger ajak moajangma.

## ANO GO ABEN TSÜNGREM DEN

### ATANGJI NUNG TSÜNGREM KÜLEMDI

"Tsüngrembo tanela aser shiri pa külemdir tanela nung aser atangji nung külemtsü tim" - Yohan 4:24.

Asenoki külemba Tsüngrem ya ajak madak tashi tulutiba lir. Tanü asenoki asen Tsüngrem ya koda külemer? Isaia 40:28 nung yamai ashir; "Teti tatem maka Tsüngrem Kibuba, alima tatembangtem teyanglusang, pa melular, aser aniseta malir .... "

Asen Tsüngrem ya Tanela lir aser Pa ya ajak nung lir aser Pai asenoki inyakba ajak meteter aser Pai ajak koktet. Asen mulungsentsü taroktiba nung miima alibajia Pai angur. Atangji, asenoki asen Tsüngrem ya teti pelaa lidaktsütsüla.


Tsüngrem ya asenoki koda angateta lir? Aiben asenoki asen Tsüngrem ya külemnü dang külemteper, Pa ajungben sarasademer... saka aji masü asenoki shidak tamanger asütsüla, ochi nung Pa tekümtet agizüka alitsüla aser asen takümüji Pa nem bendanga agütsütsüla. Kechiaser Tsüngremi asenok dang nungi imlabaji, Pa dak ochi, temeim nung Paji amangteta, külemtsü tim.

T.Ken 119:30 nung yamai ashir, "Temulung alemba lenmang ni shimtetogo: Kü madang ni nü yimsü ozüng yua lir". Asenok dang asen Tsüngrem ya ochi agi shimdi aser Pa külemba nung asenoka, Tsüngremi pelatsüsa, moatsütsüsa aser Pa den kotak lima nung ajurutepsa Pa külemdi.

#### SARASADEM:

Kibuba Yisu ochi nung Na külemtsüsa lenmang sayu nung kanga pelar. Amen.

## Donald Trump-i Tsüngrem dang nungi shisatsü meshia sarasadem



May 22, 2017 nü U.S Tir Donald Trump-i Old City, Jerusalem nung aliba Western Wall nung pa teka agi kongshidang agi noksa angur.

**Jerusalem, May 23 (Agencies):** US Tir, Donald Trump-i Hombarnü Jerusalem indang Old City nung aliba Western Wall nung kongshidang Tsüngrem dang nungi shisatsü meshia sarasadem.

Trump-i aniba evangelical advisory board nung züngsem aser U.S. ambassador for Religious Freedom atema nübo, Johnnie Moore-i, "Ni Western Wall semdang aser Tsüngrem aliba nungshilung angudang ki kanga pela liasü, ni jara nungkü teka agi kongshi aser Tsüngrem dang nungi shisatsü meshia sarasadem" ta Trump-i ashiba olen ka Twitter nung lemsatop.

US Tir teinyakdak kati Judaism atema temeshitiba tesem semdangbaji Trump mezüng lir. Pai Western Wall semdangi maodang, Khristan yimsü atema temeshi tesem Church of the Holy Sepulchre semdanga liasü.

Trump-i Saudi Arabia yimtiba Riyadh nungi Israel-i indangindanga tayimtsü aobaji otsüsütsü tatalokba ka lir, kechiyong Saudi Arabia aser Israel tsüngda tayimtsü mali. Saudi Arabia nung Trump-i Muslim nung teimba sür aliba linük 50 dak tema nungi lennirtem dang pei linüktem nung kiralongrartem meindoktsü atema tayongzükba agütsü. "Muslim tamangba lennirtemi nübortem dang taochi makaba inyaksangshi nungi pila alitsü atema ayongzükang. Nenoki kiralongra indang mapa inyakra, nü taküm tazüngla akümtsü, nü taküm tatsüka dang alitsü aser nü tanela magizüktsü," ta US Tir-isa ayongzük.

Tan ita tetenzüklen 'religious liberty' kümzüka ayutsü atema executive order ka nung sign asüba sülen US Vice President Pence-i, "Trump ji tamanger ka lir aser pai Tsüngrem dak tamang takang yur, par kibong aser alima meimer," ta metetdaktsü.

**OLONG PAITEP # 4431**

	1			2						3
4			5							
					6					
7							8			
9							10		11	
12										
							13			
14										

**TIPILEN**

- 2. Tebur tebenjem mapang - (7)
- 4. Sentong / Asameyang - (4)
- 6. Tetsung kubok - (6)
- 7. Reprangdaksü - (4)
- 8. Te \_ \_ \_ \_ wa - (4)
- 9. Iba tsütsü / Külen jagi - (4)
- 10. Yangkhu - (4)
- 12. Tamet / Yirayirar - (6)
- 13. Lenmang aika - (4)
- 14. Techishi / Tepok asung - (7)

**LANGTSÜNGLEN**

- 1. Tali / Alia - (5)
- 3. Aji asunung - (7)
- 5. Ajuru / Tenji - (4)
- 6. Tekolok tajung - (7)
- 7. Metetep - (7)
- 10. Jabaso masü - (4)
- 11. Sadang / Lema agütsü - (5)

**OLONG PAITEP # 4430 TELANGZÜBA**

**TIPILEN :**

- 1. Mera, 5. Ocet, 6. Tekolok,
- 10. Ana, 11. Bilemdang, 12. Kar,
- 14. Chinung, 16. Ajok, 17. Tawa.

**LANGTSÜNGLEN :**

- 1. Metep, 2. Asü, 3. Yiar, 4. Tebang,
- 7. Kilir, 8. Ber, 9. Oda, 10. Anasa,
- 11. Bangja, 13. Shin, 15. Nit.



**KAKETSHIR ALOKBA MERENSHIR**

Kenü anogo Alokba full uniform nung yi jemer jila tiyong nung saksüa senzua lia tanishirtemi pur parnok office nung merenshi. Idangji parnok o yamai intep.

- Timsür** : Alok na kechi school nung azünger.
- Alok** : Ni konang M/S Q ward Mkg nung azünger.
- Timsür** : Na class kwi nung azünger?
- Alok** : Ni class 8 nung azünger.
- Timsür** : Na kechiba school nungi jenzüka or yamai senzür.
- Alok** : Yisu Khrista asen menen alangzüksü asoshi pa taküm bendanga agüja kangkidong nung asüba bilemteta nia yamai inyak.
- Timsür** : Na kechi tamaji o jembir nai ashiba tetezü kechi.
- Alok** : Nenoki kü mapa tamajung inyakba ngua paper osang nung kü noksa dena adokja, kü mapa indang sangdongtsü ibaji kaketshir ajaki ngua, tarutsü atema kü dak tan sür yamaji meinyaksü. Anungji ni mezüng ashi ama kaketshir ajaki yamaji meinyaksü asoshi, Yisu ama kü taküm bendanga agüja inyak adi.
- Timsür** : Oh! Alok nasa tabensaba. Ne dang kechi anga meshika. Onoki na pelaseta chioker. Oang.
- Alok** : Kanga pelar. Tsüngremi nenok ajak moajangma. Ha! Ha! Ha!

- Lilir: A.Maong Aier, Alongmen Ward, Mokokchung.

**TANÜBO NAI LANGZÜANG**

- Q. India nung Cartoonist shibai 2017 'World Wide Fund for Nature (WWF) International President's " sempet angu ?
- [A] Rohan Chakravarty [B] Sudhir Dar
- [C] O V Puthukkody [D] Satish Acharya

(Taruba adok nung onoki langzüksü)

YASHI ADOK TELANGZÜBA :Biodiversity and Sustainable Tourism

**Tepela Tasoba Anogo**

Tanur asoba anogo nung salem osang den noksa angat adokdaksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jela e-mail : tirymyim@gmail.com nung yokang mesüra Tir Yimyim bureau tem nung agüjang.

1. Tenüng : .....
2. Tasoba anogo: .....
3. Küm : ..... 4. Class : .....
5. School : .....
6. Talidak : .....
7. Salem osang : .....

**NAIA YA METETER MA**

**Jacqueline Fernandez**



Bollywood actress Jacqueline Fernandez nem International Humanitarian Award in Editor's Choice naroküm sempet 2017 annual Asian Voice Charity Awards sentong tawa akadang agütsüogo. Lai iba sempet ya taoba küm pungo tsüngda nung India aser alima tesem aika nung charity mapa inyakba ajanga agütsü. Jacqueline Fernandez ya Sri Lanka tsür

actress, model aser 2006 küm Miss Universe tetoktepba nung takok ngua lir. La August 11, 1985 küm Manama, Bahrain nung aso.

**SUDOKU # 3543**

**TELANGZÜBA # 3542**

3				9	2	5		7	1	7	3	9	6	2	4	8	5	
5	9								9	2	6	5	8	4	7	3	1	
4		1		5					5	4	8	1	7	3	2	9	6	
		7				8	4	9	3	7	8	5	3	9	6	1	4	2
			7		5		6		2	6	1	8	4	7	9	5	3	
				1	9		7	5	4	3	9	2	5	1	8	6	7	
6				3			4		6	5	7	4	2	9	3	1	8	
	5		8	7		9	3		3	9	2	6	1	8	5	7	4	
	1	3					5		8	1	4	7	3	5	6	2	9	

**OJANG LUTEP # 4037**

- ANTEMG :
- EMANA :
- AANLIDG :
- PAMA :
- TUJANG :
- IAKTSNYÜ :
- MGTSERANÜLA :
- MÜRESA :
- RUTTASÜ :
- YAATAI :

**OJANG LUTEP TELANGZÜBA # 4036**

TEMANG ANEMA ALITSÜ ATEMA MAPANG SHIDAK NUNG CHIYONGTSÜ TAJUNG ACHITSÜLA



Anü ita petinu ajanga alima nung tsüingsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



**Aries**  
21/3-19/4

Tanü nai mapa kera atemtsü jangratsü saka item mapa nung tangari shilem agira timtem ajurutsü. Anungji nai lenmang tasen kar bushitsüla.




**Taurus**  
20/4-20/5

Tanü na kisüing anogo süyidaksütsü bilemetsü aser nai bilemba nung tangari shilem magitsü südi. Nungdakba mapang nai tangar o angatsüla.



**Gemini**  
21/5-20/6

Tanü nai nisung balala den o balala jembiba ajanga na pela alitsü. Saka iba mapang nü molungsentsü aser nü jakla tangari angur ta bilemang.



**Cancer**  
21/6-22/7

Nai jangraba ama nür kinunger aser medemertem den mapang indoktsü asoshi tanü mapang tajung asütsü. Nür medemertemi na pelatsüsa jembitsü.



**Leo**  
23/7-22/8

Tanü nai lokdi nung jembishinütsü merangang saka jembishinü ajak nai akoktsü temerang. Tanü nai tangar den külemi mapa inyakttsü yimya kar angazüktsü südi.




**Virgo**  
23/8-22/9

Nai tangar inyaksangshi nung ranglokra parnok asoshi nai khuret abentsü. Nisung aika tangar dak nungi shisatsü angazüktsü merangba nai angutsü.



**Libra**  
23/9-22/10

Tanü nai tangar inyaksangshi nung shilem magitsü merangang. Nü dang temetetba nisung kar den shisa lemsatepba ajanga nü mapa tepungbaba akümtsü.



**Scorpio**  
23/10-21/11

Tanü nai mapa inyakttsü meilongi inyakttsü merangang. Nisung aika tangar jakla angazükba mapang lir, anungji nai jakla tajung amshitsü merangang.



**Sagittarius**  
22/11-21/12

Tanü na kisüing mapang indoktsü merangtsüla. Aser nü mapa meranga inyakba ajanga nai shisa tajung aika angazükttetsü.



**Capricorn**  
22/12-19/1

Tanü nai tangar jakla metettsü südi. Anungji nü yimya balala amshia tangar den külemi mapa tulu inyakttsü asoshi nai maongka angutsü.



**Aquarius**  
20/1-18/2

Tanü nai o aika mejembi-i tangari ashiba angaba tajungtiba asütsü. Aser iba ajanga tarutsü anogo nung na asoshi jenjang tajung bener arutsütsü..



**Pisces**  
19/2-20/3

Tanü na pela linüra nai yimya tajung aketba medemer kar bushiang. Aser nai parnok na meketa ayutsü merangang.

# Sir Roger Moore arishi küm 89 nung süogo



**May 24, 2017 (Agencies):** Nüingtugu actor Sir Roger Moore, shiba James Bond shilem agiba ajanga nüingtugu küma ajaki jangjaa aküm, pa Mongolbarnü Switzerland nung süogo. Pa cancer agi shiranga liasü, ta par kinungertemi pa indang official Twitter account nung zülutsü.

Par chir asem; Deborah, Geoffrey aser Christian tenüing nung pa indang Twitter account nungi osang ka twitted sütsü. "Kanga dang temolung

mepalateti kübo Sir Roger Moore tanü asüba osang metetdaksür. Onok kanga dang mangyim tia nung lir," ta osang agütsü. Kasa osang nung yamai zülur liasü, "Sir Roger Moore KBE, Actor - Unicef Ambassador - Author."

"Temolung nung kanga mepelateti onoki kübo asüba osang agütsür. Sir Roger Moor cancer den mapang tatsüka kanga tesüita rarar tanü Switzerland nung süogo. Pa tasütsü mapang temeim agi

mekütbanger alibaji kanga dang jangratemtsüka liasü aser o kicha agi rasaa ashitsü makoker".

"Pai film tem nung shilem agiba, pa TV show tem ajanga aser UNICEF atema mapa inyakba, koba pai ajakdang temaba jenjang nung züingshir, item ajanga pa meteta alirtemi pa meimba aser pa dak saklokba tali tuluba akümtsü ta onoki meteta lir".

"Oba na nisung aika atema kanga balaka asüba atema kanga pelar. Iba ama tejashi mapang nung Kristina nungita yaritsü asoshi onok tebilemba melenshitsüla. Küboi jangraba ama pa den asüpila sentong Monaco nung akatsü. Deborah, Geoffrey aser Christian."

Par jala jabaso den külemi Moore-i pa kinungtsü pezübula toktsür iba lima nungi pilaogo.

Moore indang TV career kanga tajung liasü. Pai 1960s nung 'The Saint' nung tongti shilem agi aser 1970s tetenzüklen 'The Persuaders!' nung tongti shilem agi. Iba sülen pa 1973 küm Bond movie nung shilem agitsü asoshi maongka angu. Pai 007 shilem talingtiba agi. Küm 12 iba film nung shilem agiba nung pai movie 7 yanglu, koba nung 'Live and Let Die', 'The Man with the Golden Gun' aser 'A View To A Kill' densema lir.

## Twitter-i Abhijeet Bhattacharya indang account shibangtsü

**Mumbai, May 24 (Agencies):** Kentener Abhijeet Bhattacharya-i tetsürtem anema osang sangdongba atema Mongulbarnü Twitter-i pa indang account shibangtsüogo.

Arishi küm 58 tain kentener Abhijeet-i social media nung o tamajung aser mezüingmeshiba o amshir ta ashiba sülen Twitter-i pa indang account shibangtsü.

Abhijeet-i osangbener Swati Chaturvedi anema osang aika sangdongba sülen Twitter nung nisungtemi pa aitsütsü tenzüik.

Yaküm July ita Swati-i Abhijeet anema ken o ka benok aser iba sülen police-i pa apu.

Ajisüaka, pa bail nung chiokba sülen Abhijeet-i pai jembinüba o jembitsü ta shia liasü.

May 22, 2017 nü Abhijeet-i Twitter nung JNU student-activist, Shehla Rashid dena tetsür kar den o tamajung jembi aser iba jagi parnoki pa anema Twitter ktdangsertem den khuret lemsatep.

"Teyariteper ajak dang kanga pelar. Abhijeet-i pai züluba tweet agientsüsa tensa ajuru. Pa indang Twitter account shibangtsüogo" ta Mongulbarnü Shehla-i metetdaksü.

Ajisüaka, Twitter-i khen atema asü teti atema account ji shibangtsü'ar osang tejangja

memetetdaksü.

Osangbeneri Abhijeet den tongtepratepdang, "Kaketzülur Arundhati Roy aser JNU pusemertemi pa indang account shibangtsütsü atema mapa inyak" ta pai langzü.

"Hao, ni tang nguogo. Parnoki Paresch Rawal shibangtsütsü meranger. Paresch Rawal künati Arundhati anema tweet asüba ajanga Arundhati aser JNU teloktemi iba mapa inyaker," ta paisa shisem.

BJP MP-actor Paresch Rawal-i Kashmir nung lung agi aoner ka melena Arundhati Roy ang jeep gari nung alenoktsü asü, ta Twitter nung metetdaksüba sülen ashishitep ken o ka adok.



Cannes, May 24 : 70buba Cannes film festival tetendangertem, taoba mapang Cannes festival sempet angurtem, actor aser director tem iba benjungmong küm 70 ajungba tenü nung 'family picture' agiba angur. Cannes, France. 23/05/2017.

### TAN HOPTA ATEMA - KOMA SÜLA ?

**Q** Nagaland nung senzüba taxi aser auto rickshaw ajak ya Naga nungertemi dang anitsüla ta ozüing küma latet nunga koma süla?

Olong 20 shi nung May 26, 2017 tashi nung iba telangzüba ya onok dangi

e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Hokolbar nü adoktsütsü.

## Lord of Rock teloki Mokokchung nung concert agütsütsü



**Mokokchung, May 24 (TYO):** Lord of Rock teloki Dimapur nung mezüing concert agütsüdsang ken meimertem nem classic rock ken tejen saka tajung aika angadaksü. Tang tesüsa tentetba telok ajanga guitar junga atemba, drum junga azükba aser ken kanga junga atenba ajanga iba telok ya rock ken atener telok chichiba, ta ajitetogo.

Mokokchung nung parnok telok asoshi mezüing concert asünung par telok aser ketdangsertemi iba sentong kanga junga yanglua lir. Iba sentong ya Nagaland nung kentener temi yariteba agütsü alinung nüburtem tzüra tema reprandaksütsü imlar. Item teloki mezüing kenten sentong ayongdang Nagaland nung district balala nungi aser Shillong nungia arua repranga liasü.

Iba telok saburtemi teimla aser lenmang tajung sayuba ajanga par teloki jangraba Rock N' Roll sentong ayongtsü lemtet. Parnok asoshi iba sentong ya Nagaland nung Rock N' Roll indang chichiba jila, Mokokchung nung akatsü renem.

Ita ka shi renemshiba sülen Lord of Rock ajanga iba sentong ya Town Hall, Mokokchung nung May 27 nikongdang 6:00 ako nungi tenzüka akatsü.

Iba concert ya Temulunger Telok, VMC, Audio Garage, Rain Drops Entertainment, Shiu Lights aser Note Grid longjemer akitsü. Iba concert reprangtsü asoshi ticket ya Aria, Cosmos Entertainment nung nisung ka asoshi sen 300 agi angutsü. Iba concert nung Rag Dolls aser Mannequin telok nungia shilem agütsü.

## Top Gun tatongtep film yanglutsü Cruise-i jangjatsüogo

**Los Angeles, May 24 (Agencies):** 1986 küm sayaba 'Top Gun' den tatongtep film yanglutsü, ta actor Tom Cruise-i jangjatsüogo.

Cruise-i iba film sangküm nungi yanglu tenzüksü akok, ta osang ka ajanga metetdaksü.

TV show ka nung sensaksemba mapang Cruise dang 'Top Gun 2' yanglutsü meyanglutsü ta asüingdang, yanglutsü ta pai telangzüba agütsü.

"Ni iba film yanglu sangküm

nungi tenzüksü akok. Iba film ya kechi südir süaka yanglutsü ta ni meteta lir. Nai asüingdang nung iba osang ya nü nem tama metetdaksür," ta pai iba TV sensaksem nung ashi.

Top Gun producer Jerry Bruckheimer-i 'Top Gun' tatongtep film yanglutsüba yaküm olen ka shisema liasü aser iba osang den pai Cruise den tangokba noksa ka pa indang Twitter account nung inoktsü. "New Orleans-i kü

medemer Tom Cruise ajurui aoba tang ang tonga arur aser küna "Top Gun 2" atema tera jambitepogo," ta pai zülüsü.

"Top Gun" movie ya The Top Gun Naval Fighter Weapons School nungi Cruise-i Pilot Maverick jilu dak amendaker yangluba movie ka lir.

Iba film nung Cruise den külemi Anthony Edwards, Kelly McGillis, Val Kilmer, Tom Kazansky aser Meg Ryan nungeri shilem agir.

## Sen lakh 27.68 jenjang Volkswagen Tiguan SUV India nung sayaogo



**New Delhi, May 24 (Agencies):** Talangka nungi kanga yongya aliba Volkswagen indang Tiguan SUV tanü India nung sayaogo aser iba gari jenjang sen lakh 27.68 (ex-showroom, Delhi) nungi tenzüka angutsü. Iba gari ya tabu ana nung angutsü - Comfortline aser Highline. Comfortline ya sen lakh 27.68 aser Highline ya sen lakh 31.04 (ex-showroom, Delhi) agi angutsü.

India nung Germany nunger

ajanga amshiteter aser driver amenba ya Lumbar support lir. Touchscreen infotainment system den GPS, Cruise Control aser Automatic Climate Control nungertem iba gari nung inoka lir.

Highline tabu nung 'push button start', alloy wheel inch 18, gesture controlled tailgate, reverse parking camera, panoramic sunroof aser Comfortline nung keta aliba features tem ajunga alitsü.

Tiguan ya Volkswagen telok indang MQB (modular transverse matrix) nung ajemdaker yanglu aser 2.0-litre TSI engine den 7-speed DSG gearbox keta lir. Iba Volkswagen Tiguan nung sayar asütsü. Volkswagen Tiguan ya 2016 Axiom pamshia tetsüing pezü Delhi nung sayua liasü sen lakh agütsü.

gari ya India nung Volkswagen Tiguan ya indang gari yangluba nung nüburtemi kanga Aurangabad, Maharashtra nung rongnung iba gari ayokba ama

Comfortline tabu nung SUV temi memener, ta wheel inch 17, LED lamp nung ajanga ashi.

asertail light den DRL (daytime running lights) keta lir. Volkswagen Tiguan ya running lights) keta lir Tucson aser Honda Civic nungertem den tokteptsü.

## China nung Hollywood Film masüba film rongnung Dangkal-i sen timteba aazük

**Beijing, May 24 (Agencies):** Aamir Khan indang Dangkal film-i China nung Hollywood film masüba film tem rongnungi sen timteba ajangeta otsü tasen ka yangluogo.

Osang ka ajanga ashiba agi, Mongolbarnü tashi nung iba film-i sen million \$116 (crore 753) dak tali ajangetetogo aser iba ajanga taoba mapang nung Japanese movie 'Your Name'-i million \$84 ajangeta otsü tasen ka yanglur aliba ajatetogo.

Dangkal film koba nung China nung nungtugutiba India nunger actor Aamir Khan-i shilem agir, iba film otsü ya linük ajunga nung wadang balala nung aliba

nüburtem ajaki kanga bolua jembitepdar.

Maneni social media platform; Wechat aser Weibo amala nung iba film indang tanen makai jembitepdar. Film otsü ya tebu kati temolungtetba tulu nung par jala ana 'world-class wrestler' akümsüsa sayutetba otsü ka lir.

May 5 nü iba film sayaba nungi tenzüker tang tashi nung iba film-i takok ngua aoba ya kecha tesüingmangtsü mali, kechiyong tetenzük nungi iba film ajanga jenjang temaba ka atongtsü imlaa liasü.

Iba film ya china nung theater 7,000 nung sayaa liasü.

## Asus Zenfone Live India nung sayaogo



**May 24, 2017 (Agencies):** Sen jenjang 9,999 indang India nung Asus ZenFone Live smartphone New Delhi nung sentong ka nung sayaogo aser iba phone Bodhbarnü nungi tenzüka online aser offline shishilembadak ajak nung talitsü asoshi angutsü.

Asus ZenFone Live nung BeautyLive app keta lir koba ajanga social media sites balala nung live stream asüba mapang pasasa nüburtem tebur tajungba kümdaksür.

Iba smarthphone nung tezülen ola balala samadaksütsü asoshi duel MEMs microphone keta lir aser audio output jenjang tajungba agütsütsü asoshi 5-magnet speaker tasen ka keta lir.


Zenfone Live (ZB501KL) nung sim card ana amshitetsü (Nano+Micro) aser Android 6 Marshmallow dak amendaker aliba ZenUI 3.5 keta lir. Phone nung ano 5-inch HD (720x1280 pixels) IPS display den Bluelight

filter 2.5D curved glass, quad-core Qualcomm Snapdragon processor aser 2GB RAM keta lir.

Camera specification tem reprandangra Zenfone Live nung tejaklen camera 1.4 um pixel size, LED flash, auto-focus, aser 82-degree field of view densema 5MP lir. Tesülen camera nung Asus indang PixelMaster technology, f/2.0 perture aser 5P Largan lens densema 13MP keta lir.

Maneni Zenfone Live nung battery tashiji 2,650mAh lir aser Asus company-i ashiba agi, iba battery ajanga standby ghonda 158.8 agütsütsü, ghonda 24 3G talk-time aser ghonda 17.1 Wi-Fi mashitetsü.

Sensor temji accelerometer, ambient light sensor, digital compass, aser proximity sensor ka ta alitsü. ZenFone Live tasazük ya 141.18x71.74x7.95mm aser tozük gram 120 lir.



**Thane, May 24:** Acid agi ronger kümzükla, Lalita Ashok Ben Bansi, aser Ravi Singh-na Mongulbarnü Thane nung kibong kümer pelatepba noksa nung angur.

2012 küm kinunger tsüngta tileteri nung mangatettep adokba sülen lar kinungertemi Lalita dak acid meküploktsü. "Surgery aika agiba sülen kü tejak yamai aküm. Takum nung temelenshi arutsü asoshi ni Azamgarh nungi Mumbai anasa aliba Thane nung Kalwa tesem-i ao," ta Lalita-i ashi. Phone number tai nung jembidang Lalita-i arishi küm 27 tain, Ravi Shankar den jembi aser tena metettepa kümer ita sülen Thane court nung kibong akum.





New Delhi, May 24, 2017: Bodhbarnü New Delhi nung Ato kilonser, Narendra Modi mendenbuba ser ICT-based, multi-modal platform, PRAGATI ajanga senden amenba noksa nung angur.

## Tir election atema Sonia-i May 26 nü opposition senden ayonger

**New Delhi, May 24 (Agencies):** Tir election atema o lemteptsü asoshi Congress Tir, Sonia Gandhi-i May 26, 2017 nü opposition party tem senden ka ayongzükogo.

BJP nung madenba party tem tsüngda Tir election atema o lemteptsü asoshi Congress tongti leniri iba senden ayongzük, aser senden nung Tir candidate shimtsü atema-a jembitsüa akok.

Iba onük nung Sonia Gandhi-i BJP den madenba party aika den senden menogo aser opposition lenirtema aikati la ajurua iba onük jembio.

Item senden nungsa, teloktep

ka mesüra ka nunga dena maliba regional party tema ayongsemsü atema-a jembio.

Trinamool Congress aser Rashtriya Janata Dal party natibo iba senden nung shilem agia adentsü osang jangjatsüogo, aser iba senden nung adentsüpur tanga party temjia Brihostibarnü tashi nungbo jangjatsü.

Tawa JD(U) tongti aser Bihar Chief Minister, Nitish Kumar-i Centre sorkar dang Tir election atema ajaki melungtepa candidate ka shimtsü atema asüngdanga liasü, ajimesüra opposition party temi candidate ka shimtsüa akümtsü ta shiogo.

Opposition tsütsülen nungi

Tir candidate atema taoba mapang Angh, Gopal Gandhi aser taoba Speaker, Meira Kumar na tenüng teta jembidar.

Ajisüaka BJP-i mera agiba nung ajemdaker ang secular party temi mera agitsü.

Taoba ita CPI(M) general secretary, Sitaram Yechury-i Congress Tir, Sonia ajurua la den Tir election nung opposition party tem longjemer candidate ka shimtsü atema jembia liasü. Iba jakdang Bihar Chief Minister aser JD(U) Tir, Nitish Kumar-i Sonia ajurua la den opposition party tem longjemer Tir election atema candidate ka shimtsü atema o lemtepa liasü.

## Pak nunger raraba tayimtsü agi air space alema meinyak: IAF

**New Delhi, May 24 (Agencies):** Pakistan nunger raraba tayimtsü (fighter jets) agi Siachen air space alema yimdanga ao, ta osang prokba sülen Bodhbarnü Indian Air Force (IAF)-i, Siachen nung Pakistan nunger raraba tayimtsü agi air space yimdanga mao, ta metetdaksü.

Pakistan nunger osangbenertemi ashiba agi, Air Chief Marshal, Sohail Aman-i fighter jet squadrons exercise agiba tesem, Skardu nung aliba Qadri Airbase semdanga liasü.

Pakistan nunger osangkakettem nungsa, India tsütsülen nungi amokmeren aliba nung ajemdaker Pakistan nunger Air Force indang

forward operating bases ajak asentenshia tenzükogo.

Pakistan Chief of Air Staff, Sohail Aman-i India dang, India-i alia inyakra Pakistan-i sashia meyiptsütsü ta amokmerenogo, ta osang angazüker.

Aman-isa Pakistan Air Force nung pilot tem aser technical staff tem ajuruogo, aser iba sentong (fighter jet squadrons exercise) nung pa-a Mirage jet ka nung mener yima liasü.

India-Pakistan tesendaktep tamajungba akümba mapang ka nung, Bodhbar anepdang Pakistan Air Force (PAF) indang raraba tayimtsütem Siachen Glacier (India) anasa

yimdanga ao.

Mongolbarnü Indian Army temi Pakistan nungi kiralongrartem nokdangtsü atema Line of Control (LoC) anasa Pakistan nunger post maaka liasü.

Yaküm India Army temi Pakistan nung kiralongrartem anema surgical strikes aoba sülen ita ti sülen tang mezüng India-i Pakistan nunger sepaitem anema inyakogo.

Deobarnü Union Minister, Jitendra-i, Pakistan occupied Kashmir nung kiralongrartem anema ano surgical strike aotsü, ta amokmerenba sülen tanep Pakistan nunger tayimtsü India nunger air space anasa yimdanga ao.

## Kiralongrartemi amakba aitsür: Tir Pranab

**New Delhi, May 24** lir.

(Agencies): Bodhbarnü Tir, Pranab Mukherjee-i shidi ka ajanga British Chubatsür, Queen Elizabeth II dang, kiralongrartemi amakdang Manchester nung nisung 22 tepsetba aitsür ta ashiba den külemi mangyim osang lemsatepogo, ta tanü ketdangsertem osang ka ajanga metetdaksü.

Iba tatalokba aija Tir, Mukherjee-i, "Iba ama mangyim tejashi mapang ka nung onoki United Kingdom nüburtem aser sorkar den mangyim lemsateper," ta lemsatep.

"Iba ya United Kingdom aser par nüburtem amakba dang masü, saka meimchir ajak amakba lir," ta shidi nungjisa shia

Iba ama tatalokba ajanga alimai kiralongra anema asentenshir raratsü nungdak, ta maneni ajungmsor, ta shia pai, "Iba ama tamajungpur anema raratsü atema India-i UK aser alima linüktem den longjemtsü," ta ashi.

Hombar aonung nungtugu kentener, Ariana Grande kenten sentong tembangli bomb amshia amakdang nisung 22 asü aser nisung 59 tashi yirua liasü, aser iba tatalokba dak sendakba nung police-i melung melemi arishi küm 22 tebur ka tenüng agi, Salman Abedi pua lir.

Ano kiralongrar telok, Islamic State (IS)-ia tesüiba küm 20 tsüngda tang agi tanaben Manchester amakba ya parnok mapa lir, ta tenüng agiogo.



Kolkata, May 24, 2017: Bodhbarnü Kolkata nung SUCI züngsemtemi West Bengal sorkar nem takhangba onük balala agüja longkak aita senzüba noksa nung angur.

## IT Dept-i UP nung tesem 15 mita ao

**New Delhi, May 24 (Agencies):** Saru magütsü ochimashi rongsen bendenba anema Bodhbarnü Income Tax department-i tesem 15 nung sorkar tongti ketdangsertem meyong kiojen mita ogo.

IT ketdangsertemi Uttar Pradesh nung IAS ketdangser ana, PCS ketdangser ka aser sorkar ketdangser pongu meyong kiojen mita ao.

IT ketdangsertemi taoba mapang Ghaziabad District Magistrate (DM) Vimal Sharma, taoba mapang Baghpat DM, Harpreet Singh Tiwari, Meerut

range Regional Transport Office (RTO), Mamta Sharma nunger ki mita ao.

IT ketdangsertemisa Delhi, Noida, Ghaziabad, Lucknow, Baghpat aser Mainpuri tem nung sorkar ketdangsertem kiojen mita odar.

Osang ajanga ashiba agi, Uttar Pradesh kübok yimti trok nung tesem 15 nung sorkar ketdangsertem meyong kiojen mita ogo.

Taoba ita nunga IT department-i tesem 20 mita aodang ochimashi sen crore 10 dak tema pua liasü.



Visakhapatnam (Andhra Pradesh) May 24, 2017: India aser Republic of Singapore Navy na senteper agiba exercise, 'Simbex-17' Bodhbarnü Visakhapatnam (Andhra Pradesh) nung tembangogo. Angogo pezünü tashi linük ana senteper iba exercise agia liasü. Linük ana tsüngda kati ka dak tamang katetba temaitsü linük ana nungi navy sepaitemi kati ka meyong rong nunga mena liasü.

## U'khand nung tamang aieni aoer 21 asü

**Uttarkashi (Uttarakhand), May 24 (Agencies):** Bodhbar nikongdag Madhya Pradesh nungi Uttarakhand-i tamang aieni aoer telok ka bus nung Gangotri shrine nungi meyipa arudang Nalupani anasa aliba Bhagirathi ayong nung tsükokba lendong nung parnok 21 asü, aser nisung kar yiruogo.

Bodhbar nikongdag 6:00 ako meta bus ji gari lenmang nungi metre 300 tashi lua ayong nungiji tsükok, ta Uttarkashi District Magistrate, Ashish Shrivastava-i ashi.

Tang tashi nung tasümgang 20 bo ngutetogo aser yirua alir niusung tenet rongnung nisung kabo mozükidang meküzmükteti


asü, ta paisa ashi.

Bus nungji tamang aieni aoer parnok 29 shi liasü, aser parnok timbaka Indore nungi lir.

May 12, 2017 nungi tenzükä 'Chardham' tamang aieni aoba dak sendakba nung parnoki Yamunotri aser Gangotri na nung temeshi tesemtem semdangba sülen Haridwar-i aodang iba lendong ya atalok. Parnok Kedarnath-ia aotsü sentong liasü, ta Shrivastava-isa ashi.

Iba osang angashia Madhya Pradesh Chief Minister, Shivraj Singh Chouhan-i mangyim osang lemsatepba den külemi asür kibongtem shia nem sen lakh anana teyari agütsütsü sangdongogo.

# Vatican nung Pope Francis aser Donald Trump na ajurutep



May 24, 2017 nü Vatican City nung aliba Pope Francis-i US Tir, Donald Trump nung US Tir, Donald Trump-i Pope Francis den ajurutepdang agiba noksa angur.

**Vatican City, May 24 (Agencies):** Bodbarnü Pope Francis-i US Tir, Donald Trump Vatican nung pela agizük aser iba sülen tena senden ka amen. Tanep 8:20 ako meta US Tir-i Apostolic Palace tonga aru aser idakji Swiss Guard temi Trump aser pa kinungtsü Melania na nem tetushi agütsü. Trump-i Saudi Arabia aser Israel linüktem semdangba sülen Vatican semdang aser pai alima nung tamangba yimsü

tulutiba asem yimtibatem semdang asütsü. Pope Francis-i taoba ita tu Egypt semdangogo aser pai US Tir tanabuba den ajurutepa sendentem amen. 2014 nung pai US Tir, Barack Obama den ajurutepa liasü. Tanü Pope Francis den ajurutpedang Trump den pa kinungtsü Melanie, par jala Ivanka Trump aser kinungbo Jared Kushner, Secretary of State Rex W. Tillerson aser

national security adviser H. R. McMaster nungertem liasü. Senden amenba sülen Pope Francis-i Trump nem papal documents asem sempet agütsüba den yimjung tamaitüsü- olive branch yanglur aliba medal ka agütsü. Iba sülen Trump-i Italy Prime Minister Paolo Gentiloni den ajurutepdang, "pa (Francis) ya nisung khenyongi balaka lir, küna senden kanga junga menogo. Ni pope den ajurutepbaji maongka ka lir" ta ashi.

# Manchester bomb lendong atema police-i nisung 3 apu



May 23, 2017 nikongdang Manchester nung aliba Albert Square nung nisungtemi tasürtem nem tetushi agüja candlelit vigil ka agiba noksa nung angur.

**London, May 24 (Agencies):** Hombar aonung Manchester nung bomb apokba dak sendakba nung Bodbarnü police-i Manchester nung nisung asem puogo. "Bushisüngdang maparen nung Manchester anüdoklentip tsütsü police warrants asem agütsü" ta Greater Manchester Police atema otongdar kati ashi. Manchester suicide bomber Salman Abedi ya tangar teyaritep agia inyak asü pa kijai dang iba mapa inyak ta asüba kuli bushitepdar, ta British minister kati tanü metetdaksü. Britain yimdongtem sepa 3,800 shi ka mapa lemzüksütsü aser parnoki Buckingham Palace aser Downing Street amala tongtipang tesemtem

anüktsü, ta Interior minister Amber Rudd-ia ashi. Abedi-i tepsetba nisungtem ka khen ka ta maitsü jangjatetdar aser tasürtem rongnung arishi küm 8 tain tetsür chanu ka aser arishi küm 28 tain tebur ka dena liasü. "Abedi-i iba mapa ya pa kijai inyak masü südi ta temulung meleme bilemer" ta Rudd-isa shisem. Abedi ya 1994 küm Manchester nung aso aser par tsürabur ya Libya nungi aruba liasü, ta osang ka ajanga metetdaksü. British bushisüngdangertemi Abedi ji Syria-ia ao aser pa Islamic State den tesantaktep liasü ta ozü ketdangsertem den osang lemsatepogo, ta French Interior Minister Gerard

Collomb-ia metetdaksü. 2015 nungi kiralongrartemi France makyonga arur aser Manchester nung bomb lendong atalokba sülen parnoki Britain den yariteptsü shiogo. June 8 nü Britain nung national election agitsü sentog lir saka iba lendong atalokba ajanga election dak sendakba maparen anendaka lir. July 2005 sülen Britain nung Hombar aonung atalokba lendong ya tulutiba liasü. 2005 nung British Muslim nung pezüi London nung parnok sasa poksetdang nisung 52 tepset. Manchester bomb lendong nung nisung 64 yirua lir aser parnok rongnung 20 bo kanga mejungi lir, ta health ketdangser kati metetdaksüogo.

# Molungnen O

Taküm sota ayutsü nisung dak tashi mali, mesüra tasüba anogo madak pa ain mali nung temeim Lt. Limawati (Changtongya) mapang tatsüka shirang dang aser tasüba anogo tashi nung nübortem shirnokisa sarasadem, nübo aser rongsen agi onok yariogo nenok ajak dang kanga pelaba lemsateper. Tsüngrem nenok mapa tajungtem moajang ta sarasademtsür. Temeim Kinungtsü, Chirnur aser Kinungertem



ASO-01-04-1968  
ASU-15-05-2017

# SALT CHRISTIAN COLLEGE

(Recognised by Govt of Nagaland, UGC, Affiliated to NU) East Police colony, Dimapur-797112, Nagaland.

## ADMISSION NOTICE

Application forms for admission to Higher Secondary Class-11 (Arts) and B.A 1st semester (General & Majors) are available from the office on all working days from 10:00 am to 2:00 pm.

1. A brief oral interview /test will be conducted for spot admission.
2. Hostel facilities for both girls and boys are available

**OTHER FACILITIES**

1. Daily Morning Prayer
2. Evangelical Union
3. Campus ministry department under Rev. Thebemo Yanthan as campus minister.

SCC is centrally located accessible from all important points such as railway station, NST & private bus station, taxi parking (walking distance) but away from all noisy scenes. An idle place for learning.

**Contact :** Principal - 9436 075445  
Vice Principal- 8414 077079

# Happy Birthday

**TENÜNG :** ALANGMEN IMCHEN  
Tasoba : May 25  
Küm : 2  
Talidad : Marepkong ward Mokochung  
Tsüngremi semchir Alanger küm 2 tashi arishi moatsü nung Tsüngrem tenung asanger. Maneni semchir nem arishi talang moajang ta onok sarasadem.  
Temeim Azü, Aoo, Aba & Adi



# Duterte-i 'martial law' agütsütsü amokmerener

**Manila, May 24 (Agencies):** Bodbarnü Philippines Tir, Rodrigo Duterte-i kiralongraba anema raratsü atema linük ajungalen 'martial law' agütsütsü ta amokmerenogo. Islamist telungpurtemi police ka tekolak atangba aser Catholic nisungtem pur aoba sülen Duterte-i iba osang metetdaksü. Mongulbarnü Duterte-i Mindanao nung 'martial law' alitsü tetuyuba agütsü. Islamic State den yariteper ta kuli agütsüba telungpur telok kati ozüing alema mapa inyakba sülen Duterte-i iba ozüing agütsü. Telungpur 100 shi kati Marawi yimti nung aliba tenlaki ka nungi putir ka den nisungtem pur ao. Parnokisa kiojentem rongdoktsü aser IS wakotem alenloka yutsü. Telungpurtem jagi police ketdangser ka checkpoint nung apu aser pa tekolak atang. "Filipino linük kümzüka ayutsü atema ni kecha marentaki mapa inyaksü. Ni linük

ajaungalen martial law alitsü akok" ta Duterte-i metetdaksü. Mongulbarnü Marawi nung sepaitemi Isnilon Hapilon jenoka lir ta temulung meleme bilemba ki ka mita aoba sülen rara tenzüik. Isnilon ya Abu Sayyaf telok nung aser ano Philippine nung IS lennisang lir. United States-ia Hapilon ya alima nung kiralongrar tamajungtiba ka ta züingshir aser pa aputsü atema sen \$5 million sempet agütsütsü sangdonga lir. Yashi sepaitemi Hapilon aputsü merangba sülen telungpurtemi Marawi nung kiojen amaktsü tenzüik, ta Defence Secretary Delfin Lorenzana-ia ashi. Mongulbarnü telungpurtemi sepa ana tepset aser tenlaki ka nungi Father Chito Sukanob den nisung ishika pur ao. "Sorkar sepaitemi parnok anema inyakba mapa manenra, pur aoa alirtem tepsettsü ta amokmerenogo" ta Catholic Bishops' Conference of Philippines, Archbishop Socrates Villegas-ia ashi.



## Churachandpur...

(TAPAK 1 NUNGI)

Lanurtemi parnok taküm tenla agütsüba ajanga lisopurtemi longjemdaksüogo aser ibaji ajanga tarutsü tajung ka yangertetsü, ta paisa ashi.

V Hangkhalian-isa, JAC, DC Churachandpur R Sudhan, SP Rakesh Balwal, 27th Sector Brigadier Ajay Kumar aser 25 Bn Commandant nunger dang iba sentong takok ngua agitetsü yaritepba atema pelaba metetdaksü.

Manipur assembly nung ILP indang bill asem agizükba anema September 2015 nung lungkak aít dang nisung 9 tepset. Tasürtem rongnung kabo taoba mapang kinungertemi remogo.

## Assam nung...

(TAPAK 1 NUNGI)

Iba scheme kübok Bhubaneshwar, Bhopal, Raipur, Jodhpur, Rishikesh aser Patna nung AIIMS amenokogo aser maneni Rae Bareilly nunga AIIMS maparen teinyakdak lir.

Ano Nagpur (Maharashtra), Kalyani (West Bengal) aser Mangalagiri (Andhra Pradesh) nunga AIIMS amenoktsü atema 2015 küm agizüka lir, iba den külemi Bathinda aser Gorakhpur na nunga AIIMS amenoktsü atema 2016 küm agizüka lir.

## Nagaland CM-i...

(TAPAK 1 NUNGI)

"Iba jagi ni Lieutenant General Kotoku Sato-i inyakba mapatem ajanga ajungmeso aser ibaji dang masü saka pa indang taküm aser yimyatsüya ajanga ni ajungmeso. General Sato-i Kohima rara nung 31st Division nungi 15th Army anientsü telemetba agiba atema nisungtemi pa mezüngmeshi aser pa tekolok meshidak ta aitsü" ta Wt. Akiko-isa metetdaksü.

Iba rara nung Lt. General Sato-i pa indang General tetuyuba tashi manga aser pa kübok aliba sepaitem rara nungi anien. Parnok yatzüra masütsü, tashidak tamajung nungi jenbutsi aser yiruba zübotem anepalutsü atema Sato-i sepaitem anien. Pai sepaitem anienba sülen British-Indian army-i Naga nunger litsü meyipa agi aser iba jagi Imphal operation anen, ta laisa shisem.

"1998 küm Japanese Emperor-i UK semdangba mapang, taoba British sepaitemi Japan anema lungkak aítba sentongtem agi, idangji kü temulung nung tejembiba ka aru. Iba kasa mapang ka nung, ni Hirakubo den ajurute. Idangji pa Burma Campaign Society (BCS) nung chairman teinyakdak liasü. Iba telok ya Burma nung rarar Japanese aser British sepaitem tsüngda tai toktepsü aser putepshitsü atema mapa inyaksü asoshi tenzükba liasü. 2008 nung Hirakubo asüba sülen ni BCS nung chairwoman aküm" ta Wt. Akiko-isa ashi.

"Tsükchir tejentem tsüngda tesentaktep tajungba kümdaksütsü atema ni BCS nung inyaksü tenzük. Ni küm 20 dak tali UK nung alir aser ni küm 28 tashi British nunger ka den kibong kümer, liyonga arudar. Iba ya ajanga ni telok anaprong indang tebilembatem angateter" ta laisa metetdaksü.

## OFFICE OF THE AO STUDENTS' UNION CHUCHU TOWN Tenüngsang Agütsür

Ao Students' Union Chuchu Town lanur züngsem nungi taküm küm HSLC tatidang nung kaketsir 11 agütsüba nungi 10-i takok angu aser HSSLC tatidang nunga parnok 13 nungi 12-i takok ngua liasü. Kaketsir shirnokisa HSLC aser HSSLC 2017 nung takok tajung nguogo, nenok ajak nem tenüngsang tetushi agütsür. Aji oda, tarutsü anogotem nunga nenok wadang ajak nung takok tulu ngudakjang ta ASUCT sarasadem.

Sd/-  
T. Moameren  
President

Sd/-  
Imtiramok  
General Secretary

## Office of the Mongsen Rionsanger Putu Menden (Council)

Mokokchung Village  
P.O. Mokokchung - 798601

## SANGDONGER

Mokokchung Yim Mongsen Rionsanger Putu Menden ajanga nübur ajak dangi tongtipang osang ka maneni netshia metetdaksür.

Mokokchung Yim Mongsen Yimden-i Angour Kin Senso nungi jentokba osang kaket balala ajanga sangdonga aruogo. Parnok Mokokchung yim lika otsü nung temeten kecha mali. Shir teloki parnok den ali kimong dak sentakba nung inyaksangshidir parnok juri khuret asütsü.

Mokokchung Yim Mongsen lika kübok telok shingai yimden den tongtepratep makai kecha mesemtetmera talila inyaksü memelar.

Mokokchung Yim Mongsen Rionsanger Yimden tenüng nung:

1. J. Temjen Tatar

2. Alemwapang Tatar

3. Toshimeren Tatar

क्षेत्रीय शिक्षा संस्थान, भुवनेश्वर  
**REGIONAL INSTITUTE  
OF EDUCATION, BHUBANESWAR**  
एन सी ई आर टी (National Council of Educational Research and Training)  
NCCERT  
Sachivalaya Marg, Bhubaneswar-751022

## Admission Notice 2017-18

Advt. No. 300

Date : 22.05.2017

Applications are invited for admission to **M.Phil in Education** course offered by Regional Institute of Education, Bhubaneswar for the session 2017-18 in **Online Mode**. For details regarding Eligibility Criteria, Mode of Selection, Determination of Home State, Reservation, Fees Structure, Entrance Test etc., please visit our website [www.rieebs.ac.in](http://www.rieebs.ac.in) or [www.rieebs.ori.nic.in](http://www.rieebs.ori.nic.in)

PRINCIPAL

Government of India  
National Medicinal Plants Board  
Ministry of AYUSH  
Room No. 309, 3rd Floor,  
AYUSH Bhawan, 'B' Block,  
GPO Complex, INA,  
New Delhi-110023

Sub : Research Institutions/ Universities etc. of North Eastern Region nung Regional cum Facilitation Centre lapoktsü atema tejangrar nungi shilem agitsü asüngdang :

National Medicinal Plants Board (NMPB), Ministry of AYUSH ajanga North Eastern Region nung shilem agi ataa alirtem ajak angatettepa sentong dak aketba mapatem aser medicinal plants takok ngua inyaksü atema Regional cum Facilitation centre ka lapokner.

NMPB-i bids (Technical aser financial envelopes balala nung) nungtugu Research Institutions/ lokit tentetem, Universities etc. aser ano North Eastern Region nung lapoka aliba Govt. Sector (Central/State) nungi North Eastern region asoshi Regional cum Facilitation Centre lapoktsü atema meshir.

Tali tejangjaba metetsü atema NMPB indang website [www.nmpb.nic.in](http://www.nmpb.nic.in) mesüra Ministry of AYUSH indang website <http://indianmedicine.nic.in> nung reprangangma.

Iba atema proposals ya (technical aser financial bid na envelopes balala nung) iba advertisement adoker anogo 20 tsüngda nung agütsütsüla.

Telok kari tamalen iba atema agütsür lira ano tanaben apply asütsü menüngdaker.

(Finance & Administrative Officer)  
NMPB

"If the Wisdom is herbal, many ailments are curable"

davp 17203/11/0003/1718

## MENUNGRA BILEMTETER



LT. T. MOLUNGNENBA AO

(Tasoba : 17.11.1921 - Tasüba : 25.05.2015)

Temeim Oba, Na akümli nung meliaka, ali rongsen kecha agia malizükteba nü shisa taka sayu o, nü temeim tulu aser onok asoshi nü meim tamang sarasadem onoki kodanga mamateter aser iba temoatsü agi onok taküm len anir. Tanü nai onok toktsür orr küm ana abensaba anogo nung, meim nüktzü anur Ojala nena menungraseta amonger.

- Temeim Chirurtem, Semchirtem aser Kinungertem.

Office of the

## Mangmetong Jamir Kidong

Mokokchung: Nagaland

## TETUSHI AGÜTSÜR

MS. MERENLEMLA D/o S. Lanu Jamir & I. Alila Longkumer nem MANGMETONG JAMIR KIDONG-i konang tetushi tulu agütsür. Lai NPSC tatitang ajanga MATHEMATICS nung Assistant Professor jenjang tajung ngutet nung Tsüngrem tenüng asanger aser kanga pelar. Nü tenendak aser temulung lemetetba shisatsü tajung ajanga asen Mangmetong aser tongtipangsa Jamir kidong nem konang tajung bener arutsüogo. Tarutsü mapang ajak nung Teyanglur Tsüngremi na shisatsü aser sempet tajung maneni moajangma ta asen Mangmetong Jamir Kidong-i sarasademtsür.

Sd/-  
Mangmetsoba Jamir  
Chairman

Sd/-  
Moatemjen Jamir  
Secretary

## Alverge Academics and Careers

A subsidiary unit of Alverge Services - Dimapur

Free counseling for 2017-18 for the below listed courses

BE/B.Tech, MBBS, BDS, Nursing, B.Pharm, BCA, MCA, BBA, MBA, BSc/B.Com (all branches), Diploma, Lateral entry into Engineering

Asen lima higher studies azüngtsü bushitepdang sen aser nübo kanga indoker, aser tia maker karbo memetetba nisung nem külakokdaksür. Iba tia ajiteta **ALVERGE ACADEMICS AND CAREERS** koba Dimapur nung **ALVERGE SERVICES** indang education counseling branch ka lir, iba ajanga tanurtem admission den sendakba nung teyari agütsür.

Contact: 8011335158 / 7085270049 / 7005139093

## Goods And Services Tax

### WORKSHOP ON GST

Date : 26<sup>th</sup> May 2017 Time: 3 PM

Venue: State Banquet Hall, Kohima

### Programme

- Welcome : Shri Pankaj Kumar, IAS  
Chief Secretary, Nagaland
- Address : Dr Shürhozelie Liezietsu  
Hon'ble Chief Minister, Nagaland
- Presentation on GST : Shri Asangba Chuba Ao, IAS  
Commissioner of Taxes, Nagaland
- Question Answer Session and Discussions
- Vote of thanks : Shri Abhijit Sinha, IAS  
Finance Commissioner, Nagaland

Refreshments

Issued by: DOPR

# 9buba 0BT Kohima nung tenzükogo



Kohima, May 24: Kohima Local Ground nung May 24 nü Basketball asayamong tenzükba sentong nung Parliamentary Secretary, Khekaho Assumi aser MLA & tir NBA, Zhaleo Rio na tangokba noksa nung angur. Noksa achichi nung asayartem asaya mapang tangokba angur.

**Kohima, May 24 (TYO):** Nagaland Basketball Association (NBA) aser Suncity Kohima nati ayongzükba 9buba Open Basketball Tournament, Kohima local ground nung tanü nungi tenzükogo.

Parliamentary Secretary for Youth Resources & Sports, Khekaho Assumi iba asayamong tetenzük sentong nung tongti tesemdang asü aser pai asayar ajakdang asaya nung temaba jenjang tongtetsü asoshi yimya yimpong tajungtiba nung bendanga agüja aser tanen makai meranga asayatsü asoshi ajungshi.

Paisa ashiba agi, asaya balala ya sen aatsü asoshi lenmang tajunga ka lir aser ajidang masü iba ajanga nisung ka nungtugu kümdaktsür. Pai maneni Naga nung lanurtem dang sports ya profession ka ama agizüksü asoshi ajungshiba den külemi sorkari takok tashi yaritsü ta metetdaktsü.

Centre sorkar 'Khelo India' project kübok ground 100 yanglutsü alibaji football

ground kija masü saka iba nung tanga asaya atema aser stadium tem yanglutsü, ta paisa jangjashitsü. Basketball atema court tasen 5 yanglutsü pai metetdaktsü. Dimapur aser Kohima nung anana aser Mokochung nung ka yanglutsü.

Mananei NBA-i propose asüba agizüka, asayartem aser sports association-i molungra tang Indira Gandhi Stadium nung Indoor stadium ya cement-concrete-i melentsü asoshi kecha tebilemtsü mali, ta pai ashi.

Kasa sentong nung MLA aser NBA tir, Zhaleo Rio-i tir o jembia liasü.

Iba asayamong nung district

5 nungi telok 20-i shilem agidar aser iba asayamong Honibarnü tembangtsü. Asayamong takoker nem senpet 50,000 agütsütsü aser tanabuba jenjang nung takok angur nem senpet 30,000 agütsütsü. Takoker telok anaprongla nem trophy aser citation agütsütsü. Semifinal nung tamakok angur telok anaprongla nem sen 5000 agütsütsü. Asayamong nung Most Valued Player nem sempet sen 10,000 agütsütsü.

Aonung asayamong süaka asayamong ayongertemi asaya reprangi arur shirnok maji majemtsü chir arudir, parnok asayaba tesem nungi meindoktsü ta metetdaktsüogo.

Mezüng aonung asaya osang:

S. Naga Trouncer- 42-36- St Joseph College
Team Orca -56- 27 Team Waxbill
Team Titans -69- 49 -Highland Dazzelers
<b>DAY TWO MATCH FIXTURES (25TH MAY)</b>
Team Doberman vs Tiyi Hoppers- 10.00am
Team Dorains vs Team Airhoggs-11.00am
Mission Giants vs Kohima Chiefs -12 noon
Team Mystic Ballers "B" vs Team Stingray- 1.00pm
<b>MATCH PATRONS</b>
May 25 at 6.00pm- Merentoshi Jamir , MLA
May 26 at 6.00pm- Dr.Neiphrezo Keditsu, MLA
May 27 -at 6.00pm Guest of honour -Mnhonlumo Kikon, MLA

# Rogers Cup atema Sharapova nem wild card agütsü



**May 24, 2017 (Agencies):** Maria Sharapova 'doping' dak sendakba nung ita isheka asaya kecha nunga shilem magidaktsü arur, taküm August ita Toronto Rogers Cup nung shilem agitsü asoshi la nem asayamong ayongertemi wild card Mongolbarnü agütsüogo.

Ita 15 tashi asayamong kecha nunga shilem magidaktsü arur, Sharapova taoba ita nungi tenzükba shilem agi tenzükogo. Yaküm Australian Open asaya

metenzük tsüngda nokdanga aliba mozü la dak tendangteta liasü. Tang tashi nung WTA asayamong nung shilem agitsü asoshi la nem wild card asem agütsüogo.

Ita 15 sülen la asaya nung shilem agi tenzükba mezüngbuba asayamong Stuttgart nung asayadang semifinal tongteta liasü saka la nem French Open nung asayatsü asoshi wild card magütsü. July ita Wimbledon nung

shilem agitsü asoshi lai qualify asütsü merangtsü aser la Toronto nung asayatsü asoshi jaokba ya US Open nung shilem magitsüngda tongtibangtiba warm-up asayamong ka ama asütsü.

Rogers Cup asayamong director, Karl Hale-i Sharapova ya "fan favorite" ta jatsüogo. Arishi küm 30 tain Sharapova-i iba asayamong nung tokteptsü asoshi kanga jangrar, ta ashi. La iba asayamong nung 2014 küm tetembangbuba shilem agia liasü.

Canada tsür rongnungi temaba jenjang nung alila, Eugenie Bouchard ya Sharapova aitsür tongti rongnung ka lir. Lai Russia tsür la ya ashiochtsür ka ta aja aser tennis asayatsü asoshi pelashishia magizüki taküm tepeyong asoshi nokdangtsüla ta ashi.

Dena iba ita Madrid open tanabuba round nung asayaa liasü aser iba asaya nung arishi küm 23 tain Canada-tsürlai 7-5, 2-6, 6-4 agi Sharapova madak takok ngua liasü.

# BWF Athletes' Commission nung PV Sindhu züngsem asütsü shim

**Gold Coast, May (Agencies):** BWF Athletes' Commission nung menden pezü asoshi Bodhbarnü vote agitepba nung züngsem asütsü asoshi Olympic nung silver metal ngur alila. PV Sindhu-a shimtet.

BWF Athletes' Commission nung tetsür asem asoshi vote agütsüba nung India tsür arishi küm 21 tain-i temaba jenjang nung vote 129 ngutet.

"Züngsem ka asütsü asoshi shimtetba atema pelar. Asayar shirnoki ni shimtetogo, nü nok ajak dang kanga pelar. Iba mapa ya kanga tulu lir aser ni iba mapa tasenba nung meranga inyaktüsü," ta 2017 TOISA Player

of the Year sempet angula, Sindhu-i osangbener dang ashi.

Sindhu dang masü, Scotland nungi Kirsty Gilmour-a 'overall' nung tasembuba jenjang nung vote 103 ngutet aser Lithuania nungi Akvile Stapusaityte-i vote 25 ngua la iba commission nung tetsürtem rongnung tasembuba jenjang nung shimtet.

Sindhu, Gilmour aser Germany nunger Marc Zwiebler, shibai vote 108 ngutet, par asem ya iba commission nung küm asem inyaktüsü. Par asem-i Tan (Belgium), Hans-Kristian Solberg Vittinghus (Denmark) aser Greysia Polii (Indonesia) nungertem melentsü.

# Messi tepuokdak ayotsü totuyuba agütsüba memelenshir: Spanish Supreme Court

**Madrid, May 24 (Agencies):** Lionel Messi-i tax magütsütsü mechi taila mapa inyakba ajanga ita 21 tepuokdak ayutsü aser sen million \$2.25 senchi achitsü totuyuba agütsür ita ka sülen Barcelona telok nungi asayasang-i temepeshiba ken o benoka liasü.

2007-09 tsüngta Messi indang noksa nungi aazükba sen million 4.16 (euro) nungi tax magütsütsü mechi Belize, Britain, Switzerland aser Uruguay nung aliba company tem tenüng amshiba ajanga Argentina nungi asayar mongin aser tebu Jorge Horacio Messina 2016 küm July ita nung aitsü.

Danone, Adidas, Pepsi-Cola, Procter & Gamble aser Kuwait Food Company nung Messi indang noksa amshiba mechi sen agütsübatem meyima yua liasü.

Iba ken o nung ajemdaker

Messi aser tebu-na prong ita 21 tepuokdak ayutsü obendang agütsü, saka tepuokdak bo malitsü südi, kechiyong Spain nung iba amala aibelen ya ajaki inyaker.

Messi tepuokdak ayutsü asoshi Bodhbarnü jangjashitsü dang tax ketdangser dang pai magütsü ayuba tax sen menokba ajanga tebu nem ita 21 tepuokdak ayutsü temerenshi agütsüba nungi ita 15 dang kümtsü.

Taoba küm iba ken o jembidang Messi-i tebu dak temolung alemer aser pai aazükba sen tebu achayanga amshiba pai kicha memetet, ta shia liasü.

Saka Supreme Court-i Messi den o intepa, pai noksa nungi aazükba sen nungi tax shidak agütsü magütsü, ibajiboo meteta alitsü tim, ta shia liasü.

**Tanurbo tanur dang !**  
**Yimtong nung ayokba**  
**chiyongtsütem achitsübasä !**  
**Tetsü shia teinyaktsü timji.**  
**Tanur temang anepalua**  
**anema lidaktsütsübaji lir**

**LIVSAV FOR KIDS**

NEW PACK

Combinative Appetite Enhancer

Manufactured by: Himalaya Research Health Products Pvt. Ltd., Thane (Maharashtra),  
 CUSTOMER CARE:- 022-24861122

**BILEM DANGANG**  
**"Taküm nung nisung shingaia lenmang tailen nungi takok mangur."**